



樂城集卷之一

宋西蜀蘇轍子由著

明東吳

王執禮子懋
顧天叙禮初
全校

詩五十二首

郭綸

綸本河西弓箭手屢戰有功不賞自黎州都監官滿貧不能歸權嘉州監稅

郭綸本蕃種騎鬪雄西戎流落初無罪因循遂龍鍾
嘉州已經歲見我涕無窮自言將家子少小學彎弓
長遇西鄙亂走馬救邊烽手挑丈八矛所往如投空
平生事苦戰數與大寇逢昔在定川寨賊來如羣蜂
萬騎擁酋帥自謂白相公揮兵取其元模糊腥血紅

戰勝士氣振赴敵如旋風蚩蚩羶裘將不信勇且忠
遙語相勸誘一矢摧厥胸短兵接死地日落沙塵蒙
馳歸不敢息馬口銜折鋒誰知八尺軀脫命萬死中
忽聞南蠻叛羽檄行忽忽將兵赴危難瘴霧不辭衝
行經賀州城寂寞無人蹤攀堞奔不見入據爲築壙
一旦賊兵下百計燒且攻三日不能陷救至遂得通
崎嶇有成績元帥多異同有功不見賞憔悴落巴賔
已矣誰復信言之氣恟恟予不識郭綸聞此爲歛容
一夫何足言竊恐悲羣雄此非介子推安肯不計功
郭綸未嘗敗用之可前鋒

初發嘉州

田田

不計功

放舟沫江濱往意念荆楚擊鼓樹兩旗勢如遠征戍
紛紛上船人櫓急不容語余生雖江陽未省至嘉樹
巉巉九頂峯可愛不可住飛舟過山足佛脚見江滸
舟人盡歛容競欲揖其拇我頃已不見烏牛在中渚
移舟近山陰壁峭上無路云有古郭生璞此地苦箋
注區區辨蟲魚爾雅細分縷洗硯去殘墨遍水如黑
霧至今江上魚頂有遺墨處覽物悲古人嗟此空自
苦余今方南行朝夕事鳴櫓至楚不復留上馬千里
去誰能居深山永與禽獸伍此事誰是非行行重回

顧
過宜賓見夷中亂山

江流日益深民語漸已變岸濶山盡平連峯遠非漢
慘慘瘴氣青薄薄寒日暖峯巒若崖石草木條幹短
遙想彼居人狀類麕鹿竄何時遂平定戍卒從此返
夜泊牛口

行過石壁盡夜泊牛口渚野老三四家寒燈照疎樹
見我各無言倚石但箕踞水寒雙脰長壞袴不蔽股
日莫江上歸潛魚遠難捕稻飯不滿盂饑卧冷徹曙
安知城市歡守此田野趣秬應長凍饑寒暑不能苦

戎州

江水通三峽州城控百蠻沙昏行旅倦邊靜禁軍閑
漢虜更成市羅紉斲不還投種揀精密換馬瘦孱顏
兀兀頭垂髻團團耳帶環夷聲不可會爭利苦間關
舟中聽琴

江流浩浩羣動息琴聲琅琅中夜鳴水深天闊音響
遠仰視牛斗皆從橫昔有至人愛奇曲學之三歲終
無成一朝隨師過滄海留置絕島不復迎終年見怪
心自感海水震掉魚龍驚翻回蕩瀾有遺韻琴意忽
忽從此生師來迎笑問所得撫手無言心已明世人

鬢髮好絲竹撞鐘擊鼓浪謂榮安知江琴韻超絕擺
耳大笑不肯聽

泊南井口期任遵聖

期君荒江濱未至望已極朔風吹烏裘隱隱沙上立
愧余後期至先到犯寒色既泊問所如歸去已無及
繫舟重相邀雨冷塗路濕

江上早起

晨興孤舟上盥濯夜氣清整巾未皇坐雙擄軋已鳴
日出江霧散江上山從橫區區茅舍翁曉出露氣腥
收筒得大鯉愛惜不忍烹持之易斗粟朝飢厭魚羹

蕭蕭遠風起泛泛野鴈驚忽過百餘里山水互變更
逢舟問所如彼此不知名超超江湖間殊勝地上行
旦游市井喧莫宿無人聲江上誠足樂無怪陶朱生

江上看山

朝看江上枯崖山憔悴荒榛赤如赭莫行百里一回
頭落日孤雲靄新畫前山更遠色更深誰知可愛信
如今唯有巫山最穠秀依然不負遠來心

山胡

山胡擁蒼毳兩耳白茸茸野樹啼終日黔山深幾重
啄溪探細石噪虎上孤峯被執應多恨筠籠僅不容

白鷗

白鷗形似鵠搖曳尾能長寂寞懷溪水低回愛稻梁
田家比鷄鶩野食薦杯觴肯信朱門裏徘徊占玉塘

屈原塔

在忠州

屈原遺宅秭歸山南賓古者巴子國山中遺塔知幾
年過者遲疑不能識浮圖高絕誰所爲原歿豈復待
汝力臨江慷慨心自明南訪重華訟孤直世人不知
徒悲傷強爲築土高岌岌

嚴顏碑

亦在忠州

古碑殘缺不可讀遠人愛惜未忍磨相傳昔者嚴太

守刻石千歲字已訛嚴顏平生吾不記獨憶城破節
最高被擒不辱古亦有吾愛善折張飛豪軍中生歿
何足怪乘勝使氣可若何斫頭徐歿子無怒我豈畏
歿如兒曹匹夫受戮或不避所重壯氣吞黃河臨危
閑暇有如此覽碑慷慨思橫戈

竹枝歌

忠州作

舟行千里不至楚忽聞竹枝皆楚語楚言啁哳安可
分江中明月多風露扁舟日落駐平沙茅屋竹籬三
四家連春筍汲各無語齊唱竹枝如有嗟可憐楚人
足悲訴歲樂年豐爾何苦釣魚長江江水深耕田種

麥畏狼虎俚人風俗非中原處子不嫁如等閑雙鬟
垂頂髮已白負水採薪長苦艱上山採薪多荆棘負
水入溪波浪黑天寒斫木手如龜水重還家足無力
山深瘴暖霜露乾夜長無衣猶苦寒平生有似麋與
鹿一旦白髮已百年江上乘舟何處客列肆喧譁占
平磧遠來忽去不記州罷市歸船不相識去家千里
未能歸忽聽長歌皆慘悽空船獨宿無與語月滿長
江歸路迷路迷鄉思渺何極長怨歌聲苦淒急不知
歌者樂與悲遠客乍聞皆掩泣

望夫臺

在忠州南
數十里

江上孤峯石爲骨望夫不來空獨立去時江水拍山
流去後江移水成磧江移岸改安可知獨與高山化
爲石山高身在心不移慰爾行人遠行役

八陣磧

在夔
州

漲江吹八陣江落陣如故我來苦寒後平沙如匹素
乘高望遺迹磊磊六十四遙指如布碁就視不知處
世稱諸葛公用衆有法度區區落褒斜軍旅無闊步
中原竟不到置陣狹無所茫茫平沙中積石排隊伍
獨使後世人知我非莽鹵奈何長蛇形千古竟不悟
惟餘桓元子又視不能去

灩澦堆

或云上
有古碑

江中石屏灩澦堆
鼉靈夏禹不能摧
深根百丈無敢
近落日紛紛鳧
鴈來何人磊落
不畏死爲我赤
脚登崔嵬
上有古碑刻奇
篆當使盡讀磨
蒼苔此碑若見
必有怪恐至絕
頂遭風雷

入峽

舟行瞿唐口兩耳風鳴號
渺然長江水千里投一瓢
峽鬥石爲戶鬱怒水力驕
扁舟落中流浩如一葉飄
呼吸信奔浪不復由長篙
捩舵破瀆旋畏與亂石遭
兩山蹙相值望之不容
物漸近乃可入白鹽最雄高

草木皆倒生哀叫悲玄
猿白雲繚長袖零露如飛毛
緬懷泮水年慘蹙病有堯
禹益决岷水屢與山鬼麤
摧岡轉大石破地䟽洪濤
峴峴當道山斬截肩尾銷
峭壁下無趾連峯斷脩腰
破處不生草上不挂鳥巢
水怪不盡戮下有龍與鼉
遼哉千萬年禹歿遺迹牢
豈必見河洛開峽斯已勞

巫山廟

山中廟堂古神女楚巫
婆娑奏歌舞空山日落悲
風吹舉手睢盱道神語
神仙潔清非世人瓦盎傾
醪薦麋脯子知神君竟何
自西方真人古王母飄然
乘風

遊九州謁渡西海薄中土白雲爲車駕蒼虬駝乘湘
君宓妃御天孫織綃素非素衣裳飄飄薄烟霧泊然
冲虛眇無營朝餐屑玉嚙瓊乳下視人世安可據超
江乘山去無所巫山之下江流清偶然愛之不能去
湍崖激作相喧飀白花翻翻龍正怒堯使大禹導九
州石隕山隊幾折股山前恐懼久無措稽首山下苦
求助丹書玉笈世莫窺指示文字相爾汝擘山洩江
幸無苦庚辰虞余實相禹功成事定世莫知空山俄
頃千萬古廟中擊鼓吹長簫採蘭爲殮蕙爲肴玉缶
薦芰香飄蕭龍勺取酒注白茅神來享之風飄飄荒
山長江何所有豈有瓊玉薦沈寥神君聰明無我責
爲我驅獸攘龍蛟乘船入楚沂巴蜀潰旋深惡秋水
高歸來無恙無以報山上麥熟可作醪神君尊貴豈
待我再拜長跪神所勞

巫山廟烏

巫廟真人古列仙高心獨愛玉爐烟飢烏巧會行人
意來去紛紛噪客船

昭君村

峽女王嬙繼屈須入宮曾不愧秦姝一朝遠逐呼韓
去遙憶江頭捕鯉魚江上大魚安敢釣轉拖橫江筋

力小深邊積雪厚埋牛兩處辛勤何處好去家離俗
慕榮華富貴終身獨可嗟不及故鄉山上女夜從東
舍嫁西家

三遊洞

洞前危逕不容足洞中明曠坐百人蒼崖碑兀起成
柱亂石散列如驚麋清溪百丈下無路水滿沙土如
魚鱗夜深明月出山頂下照洞口纔及唇沉沉深黑
若大屋野老篝火青如燐平明欲出迷上下洞氣飄
亂爲橫雲深山大澤亦有是野鳥鳴噪孤熊蹲三人
一去無復見至今冠蓋長滿門

寄題清溪寺

在陝州鬼
谷子故居

清溪鬼谷子雄辯傾六國視世無足言自閉長默默
蘓張何爲者欲竊長短術學成果無賴遂爲世所惑
顛倒賣諸侯傾轉莫可執後世何不明疑我不汝及
誰知居深山玩世可終日君觀二弟子死處竟莫得
客齊自披裂投魏求寄食悠悠清溪中石亂流水急
溪魚爲朝飡老死得安穴居亂獨無言其辯吾不測

息壤

在荆南
南門外

江上寒沙薄如席一夕墳起成高丘江流傾轉力不
勝左齧右吐非自由南郡城南獨何者平地生長殊

不休當中屋背不盈尺深入百丈皆石樓古人不知
下有怪發破不掩水漲浮傳言夏鯨塞澤水上帝
此無敢偷竊持大畚負長鑄刺取不已帝使流禹
水怒非塞止網捕百怪雜蜃鰐掘塚入土不計交接
擲填壓聲鳴啾一時既定憂後世恐此竊出壞九州
神人已歿無復制故以此土封其頭發之輒滿不可
既意使靈物長幽囚前年大旱千里赤取土盈掬雨
不收誰言咫尺舊黃壤中有千歲龍與虬高山萬仞
猶可削嗟此何獨生如疣天長地遠莽無極雖有缺
壞誰能矚我疑天意固有在患世多事窮鑄鏤埏陶

鼓濤地力困久不自補無爲憂世無女媧空白石磊
磊滿地如浮漚耕田鑿井自無已息壤無幾安能酬
荆門惠泉

泉源何從來山下長溪發油然本無營誰使自激烈
茫茫九地底大水浮一葉使水皆爲泉地已不勝洩
應是衆水中獨不容至潔涓涓自傾瀉奕奕見清激
石泓淨無塵中有三尺雪下爲百丈溪冷不受魚鼈
脫衣浣中流解我雙足熱樂哉泉上翁大旱不知渴
答荆門張都官維見和惠泉

荒涼荆門西泉水誰爲洩發源雖甚微來意不可折

平鋪清地滿皎皎自明澈甘涼最宜茶羊炙可用雪
炎風五月交中夜吐明月太守燕已遠青嶂空嶮嶮
泉上白髮翁來飲杯饌闕酌水自獻酬箕踞無禮節
區區游泉人常值午日烈回首憂重城賞玩安能徹

涖陽早發

春氣入楚澤原上草猶枯北風吹栗林梅蕊颯已無
我行亦何事驅馬無疾徐楚人信稀少田畝任蓁蕪
空有道路人擾擾不留車悲傷彼何懶歎息此亦愚
今我何爲爾豈亦愚者徒行行楚山曉霜露滿陂湖

襄陽古樂府二首

野鷹來

野鷹來雄雉走蒼茫荒榛下韜繆大如斗鷹來蕭蕭
風雨寒壯士臺中一揮肘臺高百尺臨平川山中放
火秋草乾雉肥兔飽走不去野鷹飛下風蕭然嗟我
呼鷹臺人去臺已圯高臺不可見况復呼鷹子長歌
野鷹來當年落誰耳父生已不武子立又不強北兵
果南下擾擾如驅羊鷹來野雉何暇走東縛籠中安
得翔可憐野雉亦有瓜兩手捩鷹猶可傷

襄陽樂

誰言襄陽苦歌者樂襄陽太守劉公子千年未可忘

劉公一去歲時改惟有州南漢水長漢水南流峴山
 碧種稻耕田泥沒尺里人種麥滿高原長使越人耕
 大澤澤中多水原上乾越人為種楚人食火耕水耨
 古常然漢水魚多去滿船長有行人知此樂來買槎
 頭縮項鱸

雙鳧觀 在葉縣

王喬西飛朝洛陽飄飄千里雙鳧翔鳧飛遭網不能
 去惟有空履鳧已亾誰知野鳥不能化豈必雙履能
 飛揚鳧神屨怪當有在搔首野廟春風長

懷黿池寄子瞻兄

相攜話別鄭原上共道長途怕雪泥歸騎還尋大梁
 陌行人已渡古嶠西曾為縣吏民知否 轍嘗為此縣簿未赴而中
 第 舊宿僧房壁共題 轍昔與子瞻應舉過宿縣中 造
 想獨遊佳味少無言騅馬但鳴嘶

辛丑除日寄子瞻

一歲不復居一日安足惜人心畏增年對酒語終夕
 夜長書室幽燈燭明照席盤殮雜梁楚羊炙錯魚腊
 庖人饌雞兔家味宛如昔有懷岐山下展轉不能釋
 念同去閭里此節三已失初來寄荆渚魚鴈賤宜客
 楚人重歲時爆竹鳴磔磔新春始涉五田凍未生麥

相攜歷唐許花柳漸牙拆居梁不耐貧投杞避糠覈
城南庠齋靜終歲守墳籍酒酸未嘗飲牛美每共炙
謂言從明年此會可懸射同爲洛中吏相去不盈尺
濁醪幸分季新筍可餉伯嶢嶢高山美漾漾洛水碧
官閑得相從春野玩朝日安知書閣下羣子金遭馘
偶成一朝榮遂使千里隔何年相會歡逢節勿輕擲
次韻子瞻減降諸縣囚徒事畢登覽

山川足清曠闐闐巧拘囚安得憖阿御固爲穆滿遊
遙知因渙汗遠出散幽憂原隰繁分繡村墟盡小侯
春深秦樹綠野闊渭河流四顧神蕭瑟前探意漲浮

勝觀殊未已徃足詎能收下坂如浮舸登崖劇上樓
強行腰偃僂困坐氣噓咻鳥語林巒靜花明澗谷幽
濯溪驚野老伐路駭他州中散探深去文淵到處留
聽琴峯下寺弄石水中洲溪冷泉水脚山高霧遶頭
石潭清照骨瀑水濺成鈎仙廟鳴鐘磬神官素鉞劉
養生聞帝女服氣絕彭讎故宅猶傳尹先師不喜丘
居人那識道過客謾停騶巖谷誠深絕神仙信有不
雲居無几杖霞珮棄鐫鏤豹隱連山霧龍潛百尺湫
門開誰與叩桃熟浪傳偷紺髮清無比方瞳凜不侔
會須林下見乞取壽年修拔去和雞犬相隨若旆旒

乘風遺驪鬣長嘯賤笙篴從騎衣皆羽前驅鬣盡蚪
安能牽兩足甞得快雙眸自昔辭鄉樹南行上楚舟
萬江窮地脉三峽束天溝雲暗鄴都晚波吹木樨秋
尋溪緣窈窕入洞聽颼颼空寺收黃粟荒祠畫伏彪
登臨雖永日行邁肯停輶蓄縮今何事攀躋昔已悠
魏京饒士女春服聚蟬蛸雷動車爭陌花搖樹繫鞦
遊人紛蕩漾野鳥自嚶吻平日會經洛閑居願上緱
空言真比夢久渴漸成愁早退嘗相約辭貴痛自摻
愛山心劫劫從宦興油油海宇都無礙山林盡可投
願爲雲土鵠莫作盜中儵適性行隨足謀生富給喉
今遊雖不與後會豈無由晝出同穿屐宵眠共覆裘
弟兄真欲爾朋好定誰儔試寫長篇調何人肯見酬
次韻子瞻太白山下早行題崇壽院

山下晨光晚林梢露滴昇峰頭斜見月野市早明燈
樹暗猶藏鵲堂開已饌僧據鞍應夢我聯騎昔嘗曾
次韻子瞻延生觀後山上小堂

謝公遊意未能厭踏盡登山屐齒尖古殿神仙深杳
杳香爐烟翠起纖纖巖花寂歷飄瓊片庭檜蕭疎漏
玉蟾帝子莫歸人不見微風細雨自開簾

唐玉貞公主修道於

此山

次韻子瞻題仙遊潭中興寺

潭邊沙水不成泥潭上孤禽挂嶮啼
繚繞飛橋能試客蒙茸翠蔓巧藏溪
雲爲絳帳馬融室石作屏風玉女
閨仙果知君今未足臨潭脚戰
怕長梯

石鼻城

千山欲盡垂爲鼻百戰皆空但有城
虎闖穴中秦地恐龍飛渭上漢江
傾雍人未有章邯怨魏將猶存仲
達精睥睨陵遲春草滿白羊無數
向風鳴

礪溪石

呂公年已莫擇主渭河邊跪
再留雙膝臨溪不計年

神專能陷石心大豈營鱸不到礪溪上
安知自守堅

郿塢

董公平昔甚縱橫晚歲藏金欲避兵
當日英雄智相似燕南趙北亦爲京

樓觀

老聃厭世入流沙飄蕩如雲不可遮
弟子憐師將去國關門望氣載還家
高臺尚有傳經處畫壁空留駕犢車
一授遺書無復老不知何苦服胡麻

此觀尹喜舊宅神仙

傳言尹喜於流沙之西服巨勝實

次韻子瞻秋雪見寄二首

秋氣蕭騷仍見雪客愁繚繞動縈心幽吟北戶窓聲
 細歸夢函關馬迹深踈樹飛花輕款款衰荷留柄亂
 簪簪遙聞詩酒皆推勝社客何人近納睬
 平時出處常聯袂文翰叨陪舊服膺自信老兄憐弱
 弟豈關天下少良朋何時杯酒看浮白清夜肴蔬粗
 滿登離思隔年詩不盡秦梁雖遠速須膺

次韻子瞻聞不赴商幕三首

怪我辭官免入商才踈深畏忝周行學從社稷非源
 本近讀詩書識短長東舍久居如舊宅春蔬新種似
 吾鄉閉門已學龜頭縮避謗仍兼雉尾藏雉藏不能盡尾鄉人

以為
 諺

南商西洛曾虛署長吏居民怪不來妄語自知當見
 棄遠人未信本非才厭從貧李嘲東閣懶學諛張緩
 兩腮知有四翁遺跡在山中豈信少人哉

填動篋鳴只自知憂輕責少幸官卑聲名謾作耳中
 瑱科第空收額底髭西鄙猖狂猶將將中朝閑暇自
 師師近成新論無人語仰羨飛鴻兩翅差

次韻子瞻病中大雪

吾兄筆鋒雄詩俊不可和雪中思清絕韻惡愈難柰
 殷勤賦黃竹自勸飲白墮言隨飛花落意與長風簸

餘力遠見撩千里寄瓊瑤嗟予學久廢有類轉空磨
研磨久無得安可待充貨空記乘峽船行意被摧剝
溟濛覆洲渚泠冽光照坐我唱君實酬馳騁不遑臥
譬如逐獸盧豈覺山徑坳酒肴助喧熱筆硯盡霑漑
詩詞禁推類令肅安敢破亦有同行人牽挽赴程課
爾來隔秦魏渴望等飢餓徒然遇佳雪有酒誰與賀

次韻子瞻記歲莫鄉俗三首

餽歲

周公制鄉禮無有相通佐鼎肉送子必蒸豚出陽貨
交親隨高低豈問小與大自從此禮衰伏臘有飢臥

鄉人慕古俗酬酢等四坐東鄰遺西舍迭出如蟻磨
寧我不飲食無爾相咎過相從慶新春顏色買愉和

別歲

富貴日月速貧賤覺歲遲遲速不須問俱作不可追
親舊且酣飲送爾天北涯歲歲雖無情從我歷四時
酌爾一杯酒留我壯且肥長作今歲歡勿起異日悲
掉頭不肯顧曾莫與我辭酒闌氣方橫豈信從爾衰

守歲

於菟絕繩去顧兔追龍蛇是歲壬寅奔走十二蟲羅網不
及遮嗟我地上人豈復奈爾何未去不自閑將去乃

輿地集 卷一
三頁三
誼譁天上驅獸官為君肯停過魯陽揮長戈日車果
再斜醜酒勸爾醉期爾蹇蹉跎偕醉遣爾去壽考自
足誇

記歲首鄉俗寄子瞻二首

踏青

江上冰消岸草青三三五五踏青行浮橋沒水不勝
重野店壓糟無復清松下寒花初破萼谷中幽鳥漸
嚶鳴洞門泉脉龍睛動觀裏丹池鴨舌生山下鉞鑿
霑稚孺峰頭鼓樂聚簪纓編裙紅袂臨江影青蓋驛
騶踏石聲曉去爭先心蕩漾莫歸誇後醉從橫最憐
人散西軒靜曖曖斜陽著樹明

蠶市

枯桑舒牙葉漸青新蠶可浴日清明前年器用隨手
敗今冬衣着及春營傾困計口賣餘粟買箔還家待
種生不惟箱篚供婦女亦有鉏鑄資男耕空巷無人
鬪容冶六親相見爭邀迎酒肴勸屬坊市滿鼓笛繁
亂倡優狎蠶叢在時已如此古人雖沒誰敢更異方
不見古風俗但向陌上聞吹笙

子瞻寄示岐陽十五碑

堂上岐陽碑吾兄所與我吾兄自善書所取無不可

歐陽弱而立商隱瘦且楮小篆妙詰曲波字美婀娜
 譚藩居顏前何類學顏頗魏華自磨淬峻秀不包累
 九成刻賢俊磊落雜么麼英公與褒鄂戈戟聞自荷
 何年學操筆終歲惟箭筈書成亦可愛藝業嗟獨夥
 余雖謬學文書字每慵墮車前駕騏驎車後繫羸跛
 逾年學舉足漸亦行駸駸古人有遺迹筭短不及鏤
 願從兄發之洗硯處兄左

樂城集卷之一

清夢軒

樂城集卷之二

宋西蜀蘇轍子由著

明東吳

王執禮子敬

顧天叙禮初

全校

詩六十九首

畫文殊普賢

誰人畫此二菩薩趺坐花心乘象後弟子先後執盃
 正老僧槎牙森比肩山林脩道幾世劫顏貌偉麗如
 開蓮重崖宛轉帶林樹野水荒蕩浮雲天峨眉高處
 不可上下有絕澗錮九泉朝陽未出白霧起有光升
 天如月圓靈山居中粗可識有類白兔依清蹊遊人

禮拜千萬萬迤邐漸遠如飛煙五臺不到想亦爾今
之畫圖誰所傳吾兄子瞻苦好異敗繒破紙收明鮮
自從西行止得此試與記錄代一觀

聞子瞻重遊南山

終南重到已春回山木綠崖綠似苔谷鳥鳴呼嘲獨
往野人笑語記曾來定邀道士彈鳴鹿誰與溪堂共
酒杯應有新詩還寄我與君和取當遊陪

彈鳴鹿飲溪堂皆前

游終南山時事

子瞻見許驪山澄泥硯

長安新硯石同堅不待書求遂許頒豈必魏人勝近

世強推銅雀沒驪山寒煤舒卷開雲葉清露霑流發
涕潛早與封題寄書案報君湘竹筆身班

寒食前一日寄子瞻

寒食明朝一百五誰家冉冉尚厨煙桃花開盡葉初
綠燕子飛來體自便愛客漸能陪痛飲讀書無思懶
開編秦川雪盡南山出思共肩輿看麥田

大人久廢彈琴比借人雷琴以記舊曲十得三
四率爾拜呈

久厭凡桐不復彈偶然尋繹尚能存倉庚鳴樹思前
歲春水生波滿舊痕泉落空巖虛谷應珮敲清殿百

官寒終宵竊聽不能學庭樹無風月滿軒

聞子瞻習射

舊讀兵書氣已振近傳能射喜征鼙手隨樂節寧論
中箭作鴟聲不害文力薄僅能勝五斗才高應自敵
三軍良家六郡傳真法馬上今誰最出羣

種菜

久種春蔬早不生園中汲水亂瓶罌菘菜經火未出
土僮僕何朝飽食羨強有人功趨節令悵無甘雨困
耘耕家居閑暇厭長日欲看年華上菜莖

次韻子瞻題薛周逸老亭

飛鳥不知穴山鹿不知流薛子善飲酒口如汲水虬
吾觀腸胃間何異族黨州人滿地已盡一介不可留
謂子試飲水一酌不再求謂子飲醇酒百醕豈待酬
酒可水不可其說亦已悠以我視夫子胸腹百丈幽
譬如田中人視彼公與侯未省破顏飲何況裸露頭
鴟夷謂大瓠皆飽安用浮多少苟自適豈害爲朋遊
次韻子瞻題長安王氏中隱堂五首

秦中勝岷蜀故國不須歸甲第春風滿巴山晝夢非
竹深啼鳥亂花落晚蜂飛我欲西還去敲門慎勿違

其二

新坡集 卷二 三
三十一
唐朝卿相宅此外更應無請看庭前樹曾攀屋裏姝
流傳漸失實遺老不禁徂試問歸登物林間翠石孤
或云此卽歸登宅

其三

愛君高堂上有似蜀江墀墻外終南近簷西太白偏
晚梅晴自媚老竹暗相遷未到遙聞說吾廬安得然

其四

官去空留鶴山浮不見鼇竹林迎日淨槐木擁亭高
鳥噪知人至蟬鳴覺口勞誰能飲堂上解帶不穿袍

其五

君看原上墓墳盡但餘碑誰見生前貴塵生帶下龜
高堂幸有酒一飲豈論賢勉強行樂耳古人良可悲

和子瞻鳳翔八觀八首

石鼓

岐山之陽石爲鼓叩之不鳴懸無虞以爲無用百無
直以爲有用萬物祖置身無用有用間自託周宣誰
敢侮宣王沒後墳壠平秦野蒼茫不知處周人舊物
惟存山文武遺民盡囚虜鼎鍾無在鑄戈戟宮殿已
倒生禾黍厲宣子孫竄四方昭穆錯亂不存譜時有
過客悲先王綢繆牖戶徹桑土思宣不見幸鼓存由

鼓求宣近爲愈彼皆有用世所好天地能生不能主
君看項籍猛如狼身死未冷割爲脯馬童楊喜豈不
仁待汝封侯非怨汝何況外物固已輕毛擒翡翠尾
執塵惟有蒼石於此時獨以無用不見數形骸偃蹇
任苔蘚文字皴剥困風雨遭亂旣以無用全有用還
爲太平取古人不見見遺物如見方召與申甫文非
科斗可窮詰簡編不載無訓詁字形漫汗隨石缺蒼
蛇生角龍折股亦如老人遭暴橫頤下髭禿口齒齧
形雖不具意可知有云楊柳貫魴魴豈厭居溪
谷自投網罟入君俎柳條柔弱長百尺挽之不斷細

如縷以柳貫魚魚不傷貫不傷魚魚樂歎登之廟中
鬼神格錫女豐年多黍稷宣王用兵征四國北摧犬
戎南服楚將帥用命士卒驩歎生不顧闕虢虎問之
何術能使然撫之如子敬如父弱柳貫魚魚弗違仁
人在上民不怒請看石鼓非徒然長笑太山刻秦語

咀楚文

咀當
作詛

詛楚楚如桀詛秦秦則紂桀罪使信然紂語安足受
牲肥酒醪潔夸誕鬼不祐鬼非東諸侯豈信辯士口
碑埋祈年下意繞章華走得楚不付孫但爲劉季取
吾聞秦穆公與晉實甥舅盟鄭絕晉歡結楚將自救

事見呂使秦詛楚人晉亦議其後諸侯迭相詛禍福
相絕秦果誰有世人不知道好古無可否何當投涇流渾濁
 蓋鄙醜

王維吳道子畫

在普門及開元寺

吾觀天地間萬事同一理扁也工斲輪乃知讀文字
 我非畫中師偶亦識畫旨勇怯不必同要以各善耳
 壯馬脫銜放平陸步驟風雨百夫靡美人婉婉守閑
 獨不出庭戶修容止女能嫣然笑傾國馬能一蹶致
 千里優柔自好勇自強各自勝絕無彼此誰言王摩
 詰乃過吳道子試謂道子來置女所挾從軟美道子

掉頭不肯應剛傑我已足自恃雄奔不失馳精妙實
 無比老僧寂滅生慮微侍女閑繫非復婢丁寔勿相
 違幸使二子齒二子遺迹今豈多岐陽可貴能獨備
 但使古壁常堅完塵土雖積光豔長不毀

楊惠之塑維摩像

在天桂寺

金粟如來瘦如腊坐上文殊秋月圓法門論極兩相
 可言語不復相通傳至人養心遺四體瘦不為病肥
 非妍誰人好道塑遺像鮐皮束骨筋扶咽兀然隱兀
 心已滅形如病鶴竦兩肩骨節支離體踈緩兩目視
 物猶炯然長嗟靈運不知道強剪美須插兩額彼人

視身若枯木割去右臂非所患何況塑畫已身外豈
必奪爾庸自全真人遺意世莫識時有遊僧施鉢錢

東湖

不到東湖上但聞東湖吟詩詞已清絕佳境亦可尋
蜿蜒蒼石蝟蟠拏據湖心倒腹吐流水奔注爲重深
清風蕩微波渺渺平無音有鼈行在沙有魚躍在潁
鼈圓如新荷魚細如蠹蟬梧桐生兩涯蕭蕭自成林
孫枝復生孫已中瑟與琴秋蟲噪蝟蝟蜚春鳥鳴鳩鷺
有客來無時濯足蔭清陰自忘府中官取酒石上斟
醉倒臥石上野蟲上其襟醒來不知莫湖月翻黃金

油然上馬去縱意不自箴作詩招路人行樂宜及今
人生不滿百一瞬何所任路人掉頭笑去馬何駸駸
子有不肖弟有冠未嘗簪願身化爲線使子爲之鍼
子欲烹鯉魚爲子漑釜鬻子欲枕山石爲子求布衾
異鄉雖云樂不如反故岑瘦田可鑿耕桑柘可織紝
東有軒轅泉隱隱如牛涔西有管輅宅尚存青石礎
彭女留膝踝禮拜意已欽慈母抱衆子亂石寒蕭森
朝往莫可還此豈不足臨慎勿語他人此意子獨謀

真興寺閣

秦川不爲廣南山不爲高峯我眞興閣傑立陵風颺

危檻俯翔鳥跳簷落飛猱上有傲世人身衣白鶴毛
下視市井喧奔走何嗷嗷蕭然倚楹嘯遺響入雲霄
清風吹其裾冉冉不可操不知何所爲豈卽非盧敖
遊目萬里間遠山如伏羔遺語謝世俗釣魚當釣鰲

李氏園

李茂正園也俗謂皇后園蓋茂正謂其妻也

有客騎白駒揚鞭入青草悠悠無遠近但擇林亭好
蕭條北城下園號李家媪繫馬古車門隨意無洒掃
鳴禽驚上屋飛蝶紛入抱竹林淨如濯流水清可澡
閑花不着行香梨獨依島松枝貫今昔林影變昏早
草木皆蒼顏亭宇已新造臨風置酒樽庭下取栗棗

今人強歡笑古人已枯槁欲求百年事不見白鬚老
秦中古云樂文武在豐鎬置囿通樵蕪養獸讓麇麋
池魚躍金碧白鳥飛紵縞牛羊感仁恕行葦亦自保
當年歌靈臺後世詠魚藻古詩宛猶在遺處不可考
悲哉李氏末王霸出奴阜城中開芳園城外羅戰堡
繫鼓鳴巨鐘百姓皆懊惱及夫聖人出戰國卷秋潦
園田賦貧民耕破園前道高原種菽粟陂澤滿粳稻
春耕雜壺漿秋賦輸秸粟當年王家孫自庇無尺椽
空餘百歲木妄爲天巫禱遊人足譏罵百世遭舌討
老翁不願見垂涕祝襁褓持用戒滿盈飲酒無醉倒

秦穆公墓在索泉上

泉上秦伯墳下埋三良士三良百夫特豈為無益歟
當年不幸見迫脇詩人尚記臨穴惴豈如田橫海中
客中原皆漢無報所秦國吞西周康公穆公子盡力
事康公穆公不為負豈必殺身從之遊夫子乃以侯
嬴所為疑三子王澤既未竭君子不為詭三良狗秦
穆要自不得已

聞子瞻將如終南太平宮谿堂讀書

為吏豈厭事厭事日墮媮著書雖不急實與百世謀
問吏所事何過客及繫囚客實虛攬人囚有不自由
辦之何益增不辦亦足憂嗟此誰不能脫去使自收
幽幽南山麓下有溪水流溪上亦有堂其水可濯漱
終日不見人惟有山鹿吻是時夏之初溪冷如孟秋
山樵黃笠展林筍紫角抽朝取筍為羹莫以樵為羞
溪魚鯉與魴山鳥鷲與鳩食之飽且平偃仰自佚休
試探篋中書把卷揖前脩况如反故鄉親朋自相求
蔚如秦中糟久熟待一筍為文若江河豈復有刻鏤
尚何憶我為欲與我同遊我雖不能往寄詩以解愁
次韻子瞻麻田青峰寺下院翠麓亭
走馬紅塵合開懷野寺存南山抱村轉渭水帶沙渾

亭峻朱欄繞堂虛白佛尊煩襟喜脩竹勸馬樂芳蓀
白鬣柔隨手清泉滿照盆塵顏洗濯淨髀肉再三捫
饋食青蔬軟流匙細粟翻老僧勿施敬對客說山門
次韻子瞻宿南山蟠龍寺

谷中夜行不見月上下不辨山與谷前呼後應行相
從山頭誰家有遺燭是是深徑馬蹄響落落稀星著
踈木行投野寺僧已眠叩門無人狗出縮號呼從者
久嗔罵老僧下牀揉兩目問知官吏冒夜來掃牀延
客臥華屋釜中無美飪實盡愧客滿盜惟脫粟客來
已遠睡忘覺僧起開堂勸晨粥自嗟奔走閑僧閑偶

然來過何年復留詩滿壁待重遊但恐一塵埃難再讀

賦園中所有十首

時在京師

菅草朝始開呀然黃鵠背仰吸日出光口中爛如綺
纖纖吐須鬣冉冉隨風吹朝陽未上軒粲粲幽閑女
美女生山谷不解歌與舞君看野草花可以解憂悴
其二

寒地竹不生雖生常若病斲根種幽砌開葉何已猛
嬋娟冰雪姿散亂風日影繁華見孤淡一箇敵千頃
令人憶江上森聳綠崖勁無風籜自飄策策鳴荒逕
其三

蘆生井欄上蕭騷大如竹移來種堂下何爾短局促
莖青甲未解枯葉已可束蘆根愛溪水餘潤長鮮綠
強移性不遂灌水惱僮僕晡日下西山汲者汗盈掬

其四

堂後病石榴及時亦開花身病花不齊火候漸已差
芳心竟未已新萼綴枯槎誰言石榴病乃久占年華
鄰家花最盛早發豈容遮殘紅已零落婀娜子如瓜

其五

浦桃不禁冬屈盤似無氣春來乘盛陽覆架青綾被
龍鬚亂無數馬乳垂至地初如早梅酸晚作釀酪味

誰能釀爲酒爲爾架前醉滿斗不與人涼州幾時破

其六

室幽來客稀塵土積不掃鄰翁笑我拙教共種衰草
經霜斫爲簞不讓秋竹好始生如一毛張王忽侵道
鉏耨禁芟斲愛惜待枯槁有用皆勿輕吾師灌園老

其七

吾兄客關中果羸施吾宇兄雖未得還我豈如婦女
啣啣感微物涕泗若零雨但愛果羸莖屈曲上墻堵
朝見綠墻頭莫已過墻去物生隨年華還日何足數

其八

牽牛非佳花走蔓入荒榛開花荒榛上不見細蔓身
誰剪薄素紗浸之青藍盆水淺浸不盡下餘一寸銀
嗟爾脆弱草豈能凌霜晨物性有稟受安問秋與春

其九

南園地性惡雙栢不得長蓬麻春始生今已滿一丈
栢生嗟幾年失意自悽愴有子壓枝低已老非少壯
尤栢栢已寃尤地亦恐妄兩旣無所尤高枝幾時放

其十

葵花開已闌結子壓枝重長條困風雨倒臥枕丘壟
憶初始放花岌岌旌節聳得時能幾時狼籍成荒冗

浮根不任雪採剥收遺種未忍焚枯莖積壘墻角擁

和子瞻記夢二首

兄從南山來夢我南山下探懷出詩卷卷卷盈君把
詩詞古人似弟則吾弟也相與千里隔安得千里馬
攜手上南山不知今乃夜晨雞隔墻唱欹枕窓月亞
百語記一詞秋菊悲蛩吒此語鮑謝流平日我不暇
我本無此詩嗟此誰所借

蟋蟀感秋氣夜吟抱菊根霜降菊叢折寸根安可存
耿耿荒苗下唧唧空自論不敢學蝴蝶菊盡兩翅翻
蟲凍不絕口菊歿不絕芬志士豈棄友列女無兩婚

次韻子瞻題岐山周公廟

周人尚記有周公禾黍離離下有宮破豆豕豚非以
報野巫長跪若為通山圍棟宇泉流近廟後有德潤泉世亂則竭
鳳去梧桐落葉濛有客賦詩題屋壁二南猶自有遺
風

次韻子瞻題扶風道中天花寺小亭

客車來不息轍迹自成溝莫怪慵登寺猶宜賞舉頭
獨遊知憶第望遠勝登樓處處題詩徧篇篇誰為收
次韻子瞻南溪避世堂

桂枝行窮徑圍堂尚有林飛禽不驚處萬竹正當心

虎嘯風吹籟霜多蟬病瘖獸驕從不避人到記由今
未暇終身住聊為半日吟青松可絕食黃葉不須衾
偶到初迷路將還始覺深堂中有幽士挿髻尚餘簪
次韻和子瞻三遊南山九首

樓觀次韻

神仙避世守關門一世沉埋百世尊舊宅居人無姓
尹深山道士即為孫天寒遊客常逢雪日暮歸鴉自
識村君欲留身記幽寂直將山外比羗渾

五郡次韻

蜀人不信秦川好食蔗從梢未及甘當道沙塵類河

北依山水竹似江南觀形隨阜飲溪鹿雲氣侵山食
葉蠶猶有道人迎客笑白鬚黃袖豈非聃

傳經臺

輪扁不能令子巧老聃雖智若爲傳遺經尚在臺如
故弟子今無似喜賢

大秦寺

大秦遙可說高處見秦川草木埋深谷牛羊散晚田
山平堪種麥僧曾不求禪北望長安市高城遠似烟

仙遊潭五首

潭深不可涉潭小不通船路斷遊人止龍藏白沫旋

剪藤量水短挿石置橋堅橋外居民少躬耕不用錢

右潭

澄潭下無底將渡又安能慣上橫空木輕生此寺僧
曉魚聞考考石塔見層層不到殊非惡他年記未曾

右南寺

君看潭北寺何用減潭南不到還能止重來獨未厭
荒涼增客思貧病覺僧慙飲水寒難忍誰言栢子甘

右北寺

扶風貴公子早歲伴山家吹笛墮秋葉讀書隨曉鴉
業成心自叛學苦我長嗟石室非人住窮山雪似沙

右馬融石室

洞門蒼蘚合偈仄不容身傳有虛明處中藏窈窕人
吹笙橋上月拾翠洞南春往往來山下蕭然雨洒塵

右玉女洞

和子瞻調水符

子瞻令人取玉女洞水恐其見欺破竹為契使寺僧藏其一以

為往來之信故云

多防出多欲欲少防自簡君看山中人老死竟誰謾
渴飲吾井泉飢食甌中飮何用費卒徒取水負瓢罐
置符未免欺反覆慮多變授君無憂符階下泉可嚙

次韻子瞻招隱亭

隱居吾未暇何暇勸夫人試飲此亭酒自慙纓上塵
林深開翠帟岸斷峻巖闈送雪村醅醲迎陽鳥哢新
竹風吹斷籟湖月轉車輪霜葉飛投坐山梅重壓巾
欲居常有待已失歎無因古語君看取聲名本實賓

次韻子瞻凌虛臺

棄我謂我遠求我謂我還我一爾則二視此臺上山
山高上千天獨不照我顏無乃我自蔽誰謂山則慳
遠望不見趾近視不得鬢山實未始變任子自擇刪
北風吹南崖山上秋葉斑道遠又寒苦皴裂辭難攀
晴空卷朝雲照夜霜月彎強爾登此臺免爾超閭闔

扶風太守宅舊不見南山唯此臺上見之故云

次韻子瞻竹飈

野食不穿困谿飲不盜盜嗟飈獨何罪膏血自為罔
陰陽造百物偏此愚不爽肥癡與瘦黠稟受不相髣
王孫處深谷小若兒在襁超騰避彈射將中還復枉
一朝受羈縲冠帶相賓饗愚歎智亦擒臨食抵吾掌

次韻子瞻漢陂魚

漢陂霜落魚可掩枯茨破盤蒲折劔巨斧敲冰已暗
知長義刺浪那容閃鯨鯨孫蛟子誰復
如染避迨相遭已失津偶然一掉猶
豨鬣金鱗漫
嗟君遊宦

久羊炙有似遠行安野店得魚未熟口流涎豈有哀
矜自欺僭人生飽足百事已美味那令一朝欠少年
勿笑貪七筋老病行看費鍼砭羊生懸骨空自飢伯
夷食菜有不贍清名驚世不益身何異飲醞徒酷醖

和子瞻讀道藏

道書世多有吾讀老與莊老莊已云多何況其駢傍
所讀嗟甚少所得半已強有言至無言既得旋自忘
譬如飲醇酒已醉安用漿昔者惠子歿莊子哭自傷
微言不復知言之使誰聽哭已輒復笑不如斂此藏
脂牛雜肥豈烹熟有不嘗安得西飛鴻送弟以與兄

次韻子瞻南溪微雪

南溪夜雪曉來霽有客晨遊酒未消風泛餘花來逐
馬光浮斷澗不知橋山寒凍合行人息醉熟賓歡舞
意豈歸騎相將踏瑤玉嗅林閑認早梅條

和子瞻司竹監燒葦園因獵園下

駿馬七尺行馮馮曉出射獸霜爲冰荻園斫盡有枯
枿束茅吹火初如燈乍分乍合勢開展蒼烟被野風
騰騰黃狐驚顧嘯儔侶飛鳥先起如蒼蠅須臾立旆
布行伍有似脩蟒橫岡陵蒼鷹猛獸出前後缺處已
挂黃麻罾回風忽作火力怒平地一卷無疆媵商辛

不出抱寶歟曹瞞逸去焦其肱投身誤喜脫灰燼
首旋已遭侵凌何人上馬氣吞虎狐帽壓耳皮蒙膺
開弓徐射疊雙兔擁馬驩叫驚未曾舉鞭一麾百夫
進擊鼓再發箭舉棚去如飛壘中如電獲若雨獸膏
流澗肉分麾下飽壯士皮與公子留縑繒縱橫分裂
惠村塢尚有磊落載後乘吾兄善射久無敵是日斂
手稱不能憑鞍縱馬聊自適酒後醉語誰能應健兒
擊搏信可樂主將雄猛今誰勝胸中森列萬貔虎嗟
世但以文儒稱安得強弓傳長箭使射蔽日垂天鵬

木山引水二首

引水穿墻接竹梢，谷藏峯底大容瓢。將流旋滴廬山瀑，已盡還來海上潮。亂點落池驚睡覺，半山含潤沃心焦。瓦盆一斛何勝滿，溢去猶能浸菊苗。

簷下枯槎拂荻梢，山川迤邐費公瓢。幽泉細細流巖鼻，盆水瀾瀾漲海潮。但愛堅如湖上石，誰憐收自竈中焦。蒼崖寒溜須佳蔭，尚少冬青石罨苗。

興州新開古東池

山遶興州萬疊青，池開近郭百泉并。昔年種柳人安在，累歲開花藕自生。波暖跳魚聞樂喜，人來野鴨望船鳴。西還過此須終日，爲問使君行未行。

子瞻喜雨亭北隋仁壽宮中怪石

仁壽宮中穠穀生，太湖蒼石草間橫。興衰換世身猶在，南北從人事已輕。累石作臺秋蘚上，鑿汧通水細渠清。三年此亦非公有，空使他年記姓名。

用林妣韻賦雪

密雪來何晚，窮冬候欲差。投空落細米，布地淨平沙。繚繞飛相著，重仍積暗加。雨微花破碎，風細脚傾斜。次第來如摻，冥濛墮不諱。燭鵝吹勁，鞞秀葦拂輕。劫畫字飄還，沒團毬暖旋。窰出鹽東海，若鍊石古皇媧。翻簸騰歸騎，紛飄集晚鴉。庭梅辨紅萼，壠麥覆黃芽。

撥砌求新藥尋蹤射伏麋埋樓平盡脊集樹短留槎
亂下曾何擇平鋪欲盡遮欺貧寒入褐惱客重添車
積素聊成燭烹甘強試茶病僧添曉鉢老令放晨衙
融液曾何有鮮明竟不奢積多還避井化早發從畚
溜滴簷垂箸行觀逕轉地誰能相就醉都市酒容賒
送張唐英監閬州稅

閬中雖近蜀監稅本閑官豈足淹賢俊聊應長羽翰
讀書心健否答策意何闕未可厭畋獵田中有走豸
送張師道楊壽祺二同年

故國多賢俊登科並弟兄重來舊游處兩見近題名
冉冉須堪把駸駸歲可驚孤轅已南向疋馬復西征
入峽猿應苦還荆鴈已鳴喜從元帥幕官職漸崢嶸
送家定國同年赴永康掾

清慎岷山掾登科已七年迎親就魚稻爲吏擇林泉
去騎關中熱歸心沫水鮮官閑幸可樂記買鷓鴣煎
永康多鷓鴣

送霸州司理翟曼

大梁能賦客邊郡繫囚曹官職不相稱聲名終自高
試觀爲吏苦應過讀書勞努力事初宦尺絲無厭縲
送道士楊見素南遊

黃河春漲入隋溝，任意隨波日夜流。
萬里尋山如野鶴，一身浮水似輕鷗。
湖風送客那論驛，嶽寺留人暗度秋。
遲子北歸來見我，攜琴委曲記深幽。

利路提刑亾伯郎中挽詞二首

好學先鄉黨，登科復妙年。
誰爲耆舊傳，最處縉紳先。
淪謝今亾矣，風流孰繼焉。
魂歸食里社，世世仰仁賢。

其二

晚歲官仍困，終身耻自言。
廉明漢循吏，仁愛鄭公孫。
赤縣朝稱理，衡山德共尊。
遠人應罷市，處處有遺恩。

伯母同安縣君楊氏挽詞

德盛諸楊族，賢宜伯父家。
周姜職蘋藻，歆母事桑麻。
大邑移封近，陰堂去日賒。
空餘鏡奩在，時出舊笄珈。

樂城集卷之三

宋西蜀蘇轍子由著

明東吳

王執禮子敬

全校

顧天叙禮初

詩七十五首

北京送孫曼叔屯田權三司開圻司

人生不願才才士困奔走君為大農屬求暇更能否
 自我游魏博相識恨未久誰言但傾蓋信有勝白首
 清晨坐風觀落日語涼牖蒸精動如律弓健不論斗
 旁觀我不能晤語君見受秋風起沙漠淒雨濕征袖
 送行欲汲汲富貴恐君後將去聊遲遲已遠悲朋友

和強至太博小飲

誰能飲酒如傾水醉倒坐中扶不起形骸外物已如
遺升斗任君無復避霜黎冰脆寒侵齒未盡一杯先
已醉強將文字笑紅裙冷淡爲歡何足貴

和強君瓦亭

君爲魏博三年客日有江湖萬里心
蹙得野亭留馬足強循疎柳步堤陰
無人攜手共吳語得意搖頭時
越吟何日東郊過微雨竝騎鞍馬去同尋

中秋夜八絕

得月明星稀
烏鵲南飛

長空開積雨清夜流明月看盡上樓人
油然就西沒

誰遣常時月偏從此夜明暗添珠百倍潛感兔多生
欲見初容燭將升尚有星漸高圍漸小雲外轉亭亭
明入庭陰白寒侵酒氣微夜深看更好樓上漸人稀
浮光看不定重露試還無影翻狂舞客明誤已棲烏
巧轉上人衣徐行度樓角河漢冷無雲冥冥獨飛鵲
猿狖號枯木魚龍泣夜潭行人已天北思婦隔江南
看久須扶立行貪遂失歸誰能終不睡爛醉羽觴飛
次韻王君貺尚書會六同年

有美佳賓賢主人布衣曾共脫京塵歡來未覺歲華
晚醉後能令秋氣春發譽早同初宦日收功終藉老

成身他年此會應圖畫傳入誰家屏障新

王公生日

純陰十月晚勁氣肅羣驕惟有喬松在長看積雪消
生賢稟真性特立冠當朝早歲初成賦羣雄已失標
治才精破竹廷論壯生飈博士皆推賈宣皇重試蕭
周旋窮政體出入解心焦九列高稱冠三台豈足超
論功歸賴霸舉相待虞姚驥騁經新臥弓強發久詔
百年時節在四海衆心翹當見飛中使齎金賜此朝

二府生日
例賜金帛

次韻姚孝孫判官見還岐梁唱和詩集

伯氏文章豈敢知岐梁偶有徃還詩自憐兄力能兼
弟誰肯填終不聽篋西號春游池百頃南溪秋入竹
千枝恨君曾是關中吏屬和追陪失此時

次韻王臨太博馬上

冬晚霜露重城遙鞍馬勞徒知事奔走曾未補毫毛
水旱嗟頻感瘡痍費抑搔莫歸何暇食堆按簿書高
次韻王君壯都偶成三首

河轉金隄近天高魏闕新千夫奉儒將百獸伏麒麟
校獵沙場莫談兵玉帳春關南知不遠誰試問蕃隣

其二

天寶亂已定河壩兵更多故城埋白骨遺俗喜長戈
臥獸常思肉奔鯨不受羅縱橫竟安在唯見冢嵯峨

其三

禁籞封金殿清河貫石門時平餘古木兵散有空屯
形勝山圍閣蕃宣海內尊川原不論頃雲夢可勝吞
次韻沈立少卿白鹿

白鹿何年養驚猜未肯馴軒除非本性飲食強依人
照影冰浮水飛毛雪灑塵獨游應已倦忽見乍疑神
野色明幽步煙蕪薦臥身異姿人共愛清意爾誰親
日暖山苗熟風微澗草春何緣解韁繫奔放任天真

送陳安期都官出城馬上

城中二月不知春唯有東風滿面塵歸意已隨行客
去流年驚見柳條新簿書填委休何日學問榛蕪愧
古人一頃稻田三畝竹故園何負不收身

登上水關

淇水泐泐入禁城城樓中斷過深清空郊南數牛羊
下落日迴瞻觀闕明歲月逼人行老大江湖發興感
平生畫舫早晚籠新屋慰意來看水面平

寒食贈遊歷沙諸君

城南壓沙古河淤沙上種梨千萬株隆冬十月我獨

往風吹葉盡枝條踈老僧屈指數春候却後百日花
當蘇微風細雨膏潤足枝頭萬萬排明珠齊開競發
不知數照曜冰雪明村墟此時官閑得遊賞長堤平
穩宜驂駒寺門古木芽葉動倉庚布穀相和呼及時
行樂不可緩歲長春短花須更僧言我意兩相值欲
往屢已脂吾車今朝寒食煙火斷薄雲蔽日風沙除
此花久已待我至况有朋友相攜扶來邀反覆不能
往豈獨負君花已辜諸君高邁足才思佐酒况得萬
玉奴坐中未醉慎無起倒戴當使山公如

明日安厚卿強幾聖復召飲醉次前韻

芳樽酌水清無淤梨園著雪迷根株鄴官士女喜行
樂坐上醉客誰親踈倦遊不知歲月過痛飲漸覺筋
骸蘇風吹落片亂鶯毳雨結細實駢明珠雲屯冰積
動論頃誰信城郭涵村墟坐觀明媚低照席行看繁
鬧橫遮駒我貧不辦供酒炙側耳日聽交朋呼無端
人事巧拘束曾不見置閑須臾長鯨渴水求入海老
驥伏櫪思就車清明未過春未老寒食豈必節與除
二君爲我重置酒席上醉倒交相扶歡娛安用苦酬
酢叫嘯不畏相罪辜昏然已覺萬物小下視吏役真
婢奴請君數具牛酒費此外百事何能如

次韻柳子玉郎中見寄

新年始是識君初，顧我塵埃正滿裾。
談辯未容朝夕聽，情親空愧往還書。
久聞筆陣無前敵，更擬詩壇託後車。
待得入城應少暇，相從有約定何如。

秀州僧本瑩淨照堂

有僧訪我攜詩卷，自說初成淨照堂。
求得篇章書壁素，不論塵土漬衣黃。
故山別後成新歲，歸夢春來遶舊房。
看取盈編定何益，客來無語但循牆。

京師送王頤殿丞

憶遊長安城，皆飲母卿宅。
身雖坐上賓，心是道路客。

笑言安能久，車馬就奔迫。
城南南山近，勝絕聞自昔。
徘徊竟莫往，指點煩鞭策。
道傍古龍池，深透河渭澤。
山行吾不能，愧此纔咫尺。
壯哉誰開鑿，千頃如一席。
參差山麓近，滉蕩波光射。
君時在池上，俗事厭紛劇。
望門不敢叩，恐笑塵土迹。
自從旅京城，所向愈無適。
君來曾未幾，已復向南國。
扁舟出淮汴，唯見江海碧。
野人處城市，長願有羽翮。
脫身相從遊，未果聊自責。

石蒼舒醉墨堂

石君得書法，弄筆歲月久。
經營妙在心，舒卷功隨手。
惟茲逸羣氣，扶駕須斗酒。
作堂名醉墨，揮灑動牆牖。

安得濁酒池淋漓者濡首但取繼張君莫顧顛名醜
遊淨因院寄璉禪師

歲月潛消日裏冰依然來見佛堂燈此身已自非前
我問法何妨似舊僧灑面飛泉時點點壓池蒼石尚
層層遙知近愛金山好江水煎茶日幾升

送柳子玉

柳侯白首郎風格終近古舊游日零落新輩誰與伍
人情逐時好變化無定主試看近時人相教蹈規矩
行身劇孔孟稱道皆舜禹但求免譏評豈顧愁肺腑
坐令不羈士舉足遭網罟緬懷我生初遺俗尚目睹

中庸雖已下比近則猶愈老成慎趨好後生守淳魯
豈效相謾欺銜牛沽馬脯過惡酒色間可罪非可惡
譬如嵇與阮心迹豈深蠹京師逢柳侯往事能歷數
歎息子美賢相與實舊故至今存篇章醉墨龍蛇舞
斯人今苟在亦恐終囚虜惜哉時論隘安置失處所
一麾寄河壖垂老幸有土世俗安足論且盡杯中醕
送蘇公佐修撰知梓州

乘輅舊西蜀出鎮復東川父老知遺愛壺漿定滿前
江山昔年路旌節異邦權望重朝中舊彊分劍外天
歲登無猛政蠻服罷防邊去國身雖樂憂時論獨堅

孤誠抱松直彙進比茅連我亦相從逝踈狂且自全
送任師中通判黃州望重傳中書臺公險伏天
一別都門今五年劇談精壯故依然厭居巴蜀千山
底決任荆河十頃田老去功名無意取身閑詩筆更
能專黃州無事聊須飲世俗方今自足賢
京師三日雪雪盡泥方深閉門謝還往不聞車馬音
西齋書帙亂南窓初日升展轉守床榻欲起復不能
開戶失瓊玉滿塔松竹陰客從遠方來疑我何苦心
踈拙自當爾有酒聊共斟

次韻楊袞直講攬鏡

鬢髮年來日向衰相寬不用強裁詩壯心付與東流
去霜蟹何妨左手持花發黃鸝巧言語池開楊柳關
腰肢勸君行樂還聽否卽是南風苦熱時

送錢婺州純老

桃花汴水半河流已作南行第一舟倦報朝中言嘖
亂喜聞淮上櫓咿啣平時答策詞無枉此去爲邦學
更優自古東陽足賢守請君重賦沈公樓

次韻柳子玉見贈

壯心衰盡愧當年刻意爲文日幾千老去讀書聊度

歲春來多睡苦便羶夢歸似鴈長飛去才短如蠶只
自纏唯有聞詩尚思和可能時寄最高篇

次韻任遵聖見寄

故國老成誰復先壯心空記語當年灌夫失意貧無
友梅福辭官晚作仙詩句清新非世俗退居安穩卜
江天它年我亦從君隱多買黃魚煮復煎

次韻劉貢甫學士畫松石圖歌

長松大石生長見揭遊塵土嗟空羨寒翠關心失舊
交榮華過眼驚流電破繒買得古畫圖遺墨參差隨
斷線螺枝倒掛風自舞直榦孤生看回向故山舊物

遠莫致愛此隨人共流轉物生真偽竟何有適音一
時寧復辨少年所好老成癖傍人指笑嗟矜衒京城
宅舍松石希買費百金猶恐賤

送頓起及第還蔡州

詔書京輔起沉淪歲貢仍居第一人不愧得官名暫
屈自誇對策語深淳讀書飽足終無厭從宦奔馳自
此新我去淮陽今不久鄰邦時得問音塵

初到陳州二首

謀拙身無向歸田久未成來陳爲懶計傳道愧虛名
俎豆終難合詩書強欲明斯文吾已試深恐誤諸生

其二

久愛閑居樂茲行恐遂不上官容碌碌飽食更悠悠
枕畔書成癖湖邊柳散愁踈慵愧韓子文字化潮州

柳湖感物

柳湖萬柳作雲屯種時亂插不須根根如卧虵身合
抱仰視不見蜩蟬喧開花三月亂飛雪過牆度水無
復還窮高極遠風力盡棄墜泥土顏色昏偶然直墮
湖中水化為浮萍輕且繁隨波上下去無定物性不
改天使然南山老松長百尺根入石底蛟龍蟠秋深
葉上露如雨傾流入土明珠圓乘春發生葉短短根

大如指長而堅神農嘗藥最上品氣力直壓鍾乳温

物生稟受久已異世俗何始分愚賢

嘗見野人言柳花入水為浮萍

松上露墮地為仙茅陰乾服之益人古方云十斤鐘乳不如一斤仙茅

柳湖久無水悵然成詠

平湖水盡起黃埃惟有長堤萬萬栽病鶴摧頽沙上
舞游人寂寞岸邊回秋風草木初搖落日暮樵蘇自
往來更試明年春絮起共看飛雪亂成堆

次韻孫戶曹朴柳湖

踈慵非敢獨違時野性顛狂不受羈猶有曲湖容笑
傲誰言與物苦參差水乾生草曾非惡鶴舞因風忽

自怡最愛柳陰遲日暖幅巾輕履肯相隨

贈李簡夫司封

平生談笑接諸公歸老身心著苦空往事少能陪晤
語新詩時喜挹清風形骸摩詰羸偏健筆札西臺晚
更工笑我壯年常苦病異時何以作衰翁

次韻李簡夫秋園

秋色豈相負小園仍有花遶欄吟落日拾徑得殘葩
菊細初藏蝶桐疎不庇鴉遊觀須作意霜雪僅留槎
題李簡夫葆光亭

遙草侵芒屨庭花墮石臺小亭幽事足野色向人來

坐上烏皮几墻間大瓠罍老成無不可談笑得徘徊
次韻李簡夫因病不出

十五年來一味閑近來推病更安眠鶴形自瘦非關
老僧定端居不計年坐上要須長滿客杖頭何用出
攜錢未嫌語笑妨清靜閑暇陪公几杖前

張安道尚書生日

出入三朝望愈尊淮陽退臥避喧煩崇高歷徧知皆
妄風俗頗遷氣獨存世事直須勞舊德歸心那復厭
名藩赤松作伴功雖切白髮憂時義所敦仁比高山
年自倍秋逢生日喜盈門知公知命身無禱聊爲生

靈舉壽樽

送劉道原學士歸南康

大川傾流萬物俱根旋脚脫爭奔徂流萍斷梗誰復
 數長林巨石曾須史軒昂顛倒唯恐後嗟子何獨強
 根株三年一語未嘗屈擬學文舉驚當塗心知勢力
 非汝敵獨恐清議無遺餘扁舟歲晚告歸覲家膳欲
 及羞尊鑪隱居高節世所尚掛冠早歲還州閭紛紜
 世事不著耳得失豈復分錙銖投身固已陷泥滓獨
 立未免遭霑濡君歸左右識高趣牛毛細數分賢愚

題滑州畫舫齋贈李公擇學士

窓戶重重向日明船居氣味此中生汀洲出沒叢花
 短波浪澄虛兩岸平竄逐南來身未穩安閑感物意
 猶驚前賢事迹君今似不愧當年畫舫名

歐陽公南還佐是邦

而為此齋公擇之
謫亦從南來故云

送王恪郎中知襄州

魏公德業冠當年汝守威名竦漢邊將相傳家俱未
 遠子孫到處各推賢風流最喜君真似符竹連分政
 得專峴首重尋碑墮淚習池還指客橫鞭逃亡已覺
 依劉表寒俊應須禮浩然當有郡人知古意欄街齊
 唱接離篇

和張安道讀杜集用其韻

我公才不世晚歲道尤高與物都無著看書未覺勞
微言精老易奇韻喜莊騷杜叟詩篇在唐人氣力豪
近時無沈宋前輩茂劉曹天驥精神穩層臺結構牢
龍騰非有迹鯨轉自生濤浩蕩來何極雍容去若遨
壇高真命將彘亂始知髦白也空無敵微之豈少褒
論文開錦繡賦命委蓬蒿初試中書日旋聞廊時逃
妻孥隔豺虎關輔暗旌旄入蜀管三徑浮江寄一艘
投人慙下舍愛酒類東臯漂泊終浮梗迂疎獨釣鰲
誤身空有賦拚脛惜無袍卷軸今何益云丁昔未遭

相如元竝世惠子謾臨濠得失將誰怨憑公付濁醪

送張公安道南都留臺

識公歲已深從公非一日仰公如重雲庇我貧賤迹
公歸無留意我處念平昔少年喜文字東行始觀國
成都多遊士投謁密如櫛紛然衆人中顧我好顏色
猖狂感一遇邂逅登仕籍爾來十六年鬢髮就衰白
謀身日已謬處世復何益從來學俎豆漸老信典冊
自知百不堪偶未三見黜譬如溝中斷誰復強收拾
高懷絕塵土舊好等金石庠齋幸無事樽俎奉清適
居然遠憂患况復取衿式汪洋際海深淡泊朱弦直

狗時非所安歸去亦何失道存尚可卷功成古難必
還尋赤松子獨就丹砂術恨無二頃田伴公老蓬單
傳欽之學士濟源草堂

聞有高居直百金西山南麓北山陰園通濟水池塘
好花近洛川顏色深人去節旄分重鎮客來猿鶴感
幽吟湫溪雨過西湖漲歸興蕭然定不任

欽之時
在許州

文與可學士墨君堂

虛堂竹叢間那復厭竹遠風庭響交戛月牖散凌亂
尚恐晝掩關嬋娟不長見中堂開素壁蕭颯起霜幹
隨宜賦生意落筆皆葱蒨根莖雜土石枝葉互長短

依依露下綠冉冉風中展開門視叢薄與此終何辨

故成都尹陸介夫挽詞

擁節西南未一年淒涼道路泣東轅蜀都富樂直當
惜民事艱難誰復論白馬何人趨遠日青芻盈束更
無言異時歸去逢遺老空聽咨嗟述舊恩

次韻柳子玉謫官壽春舟過宛丘見寄二首

局冷曾非簿領迷幽居渾似未官時忽聞客至驚還
喜出見泥深笑不知謀拙未能憂歲計身閑聊可飽
晨炊行舟借問何忽草淮口無潮月正虧

獻酬不用辭升斗曲直何勞問尺尋要路風波無限

惡謫居情味最能深交從錦水初無間鄰卜共山已
有心草聖詩豪並神速數因南鴈惠佳音

次韻子瞻穎州留別二首

託身遊宦鄉終老羨箕穎隱居亦何樂親愛形隨影
念兄適吳越霜降水初冷翩然事舟楫棄此室廬靜
平明知當發中夜抱虛警永懷江上宅歸計失不猛
人生狗所役有若魚墮井遠行豈易還劇飲終難醒
不如早自乞閑日庶猶永世事非所憂多憂亦誰省

其二

放舟清淮上蕩潏洗心曾所遇日轉勝恨我不得同

江淮忽中斷陂埭何重重紫蟹三寸筐白鳧五尺童
赤鯉寒在汕紅粳滿霜風西成百物賤加食慰貧窮
胡爲復相念未肯安南東人生免饑寒不受外物攻
不見田野人四壁編茅蓬有食輒自樂誰知富家翁
陪歐陽少師永叔燕穎州西湖

西湖草木公所種仁人實使其甘棠重歸來築室傍湖
東勝遊還與邦人共公年未老髮先衰對酒清歡似
昔時功成業就了無事令名付與他人知平生著書
今絕筆閉門燕居未嘗出忽來湖上尋舊遊坐令湖
水生顏色酒行樂作遊人多爭觀竊語誰能呵十年

思穎今在穎不飲耐此遊人何

歐陽公所蓄石屏

石中枯木雙扶疎粲然脉理通肌膚剖開左右兩相
屬細看不見毫髮殊老樗剝落但存骨病松惟悴空
留鬚丘陵迤邐山麓近雲烟澹霽風雨餘我驚造物
巧如此刻畫瑣細供人須公家此類尚非一客至不
識空嗟吁案頭紫雲抱明月床上寒木翻飢鳥賦形
簡易神自足鄙棄筆墨嗟勤劬天工此意與人競雜
出變惟驚羣愚世間淺拙無與敵比擬穎有公新書

月石硯屏及石上寒
林棲鳥皆公詩所賦

次韻子瞻初出穎口見淮山

清淮此日見滄浪始覺南來道路長
悤轉山光時隱見船知水力故軒昂
白魚受釣收寒玉紅稻堆場列
遠岡波浪連天東近海乘桴直恐漸茫茫

次韻子瞻壽州城東龍潭

東行取次閱三州擊鼓清晨復解舟
車騎紛紜追過客歌鐘淒咽動潛虬
宦遊底處非巢燕歸計何嫌誚
沐猴賴有故人憐遠適慙勸酒行周

和子瞻渦口遇風

長淮暮生風來自渦河口
新舟雖云固波浪亦難受

詩來話艱厄驚恐及兒婦憶同沂荆峽終夜愁石首
餘颺入幃幄跳沫濺窓牖平生未省見驚顧欲狂走
爾來涉憂患漸覺成老醜遙喜波浪中時能飲醇酒

和子瞻濠州七絕

塗山

娶婦山中不肯留會朝山下萬諸侯古人辛苦今誰
信只見清淮入海流

彭祖廟

長說先師似老彭共疑好學古書生不知亦解食雲

母白日登天萬事輕

山有雲母云
彭祖所採服

逍遙堂

莊周墓上
祠堂也

猖狂戰國古神仙曳尾泥塗老更安厭世乘雲人不
見空墳聊復葬衣冠

觀魚臺

莊子談空惠子聽郢人斤斧缺忘形莫嗟質喪無知
者對石何妨自說經

虞姬墓

布叛增亡國已空摧殘羽翮自令窮艱難獨與虞姬
共誰使西來敵沛公

四望亭

大和中郡守劉嗣之立
李紳為之記今亭廢矣

唐史不聞劉嗣之空傳短李舊歌詩高亭毀盡唯存
記猶有區區父老知

浮山洞

洞在淮上夏潦不能及而冬不加高故人疑其浮也

洞府元依水面開秋潮每到洞門回幽人燕坐門前
石長看長淮船去來

和子瞻泗州僧伽塔

清淮濁汴爭強雄龜山下閔支祁宮高秋水來無遠
近蕩滅洲渚乘城墉千艘銜尾誰復惜萬人雨泣哀
將窮城中古塔高百尺下有蛻骨黃金容蛟龍百恠
不敢近迴風倒浪歸無蹤越商胡賈豈知道脫身獻

寶酬元功至人已立萬物表劫火僅置毛孔中區區
淮汴亦何有一挹可注滄溟東胡爲尚與水族較時
出變恠驚愚聳於乎此意不可詰仰觀飛拱凌晴空
次韻子瞻發洪澤遇大風却還宿

昨夜宿鴻澤再來遂如歸却行雖云拙乘險諒亦非
誰言淮陰近阻此駭浪飛長風徑千里蛟蜃相因依
眇然恃一葉此勢安可違冒涉彼何人勇決生慮微
欲速有不達魚腹豈足肥風帆尚可轉野廟誰能祈
但當擁衾睡慎閉牕與扉夜間聲尚惡起視聊披衣
次韻子瞻記十月十六日所見

君不見天高后土黃變化出入唯陰陽旋疑細霧作
飛電復遣震雷追日光可憐萬物甚微細坐聽百變
隨顛僵深根固蒂無計遯倏來忽返安能防平生未
見實驚耳稍遠不知如隔牆君看歌舞醉華屋下有
纍紮排兩廊眼前苦樂尚懸絕空中造化知有亡我
居死丘厭凝沍雪翻海水填陂塘但知膏澤利牟麥
恣食麩餌真嘉祥山陽所記亦何事有酒胡不盡一
觴

樂城集卷之三 終

清夢軒

樂城集卷之四

宋西蜀蘇轍子由著

明東吳

王執禮子敬

全校

顧天叙禮初

詩七十四首

次韻子瞻廣陵會三同舍各以其字為韻

劉貢甫

貢甫少多才交遊一何衆談詞坐傾倒玉塵日揮弄
逡巡不為虐巧捷有微中羣情忌超邁微過出嘲諷
南遷時已久未見肯力貢舌在終自竒髀滿安足痛
人生百年內僅比一朝夢駸駸就消涸斗水傾漏甕

江淮未可嫌遲晚聊自送試觀終日閑何似兩耳閑
孫巨源

巨源學從橫世事夙討論著書十萬字辯如白波翻
諫垣適多事憂心生病根立談信無補閉口出國門
棄置臥江海閔嘿寧復言朝行共長歎逐客繼二孫
謂莘老 南方固鄉黨謫官侶鶴猿風俗未寧靜朋黨
巨源 爭排跟引去良自得濁清在澄源往者未可招冠蓋
方駿奔

劉莘老

莘老奮徒步首與觀國賓儼然自約束被服鞞與紳
黽勉丞相府接迹輿臺臣顧嫌任安躁未忍裂坐茵
推置冠解豸謂言我比鄰三晉固多士骯髒存斯人
竄責不敢辭狂言見天真南方異風俗強食魚尾莘
應同賈太傅抱屈耻自陳猶有痛哭書受釐定何辰

和子瞻金山

長江欲盡闊無邊金山當中唯一石潮平風靜日浮
海縹緲樓臺轉金碧瓜洲初見石頭城城下波濤與
海平中流轉柂疑無岸泊舟未定僧先迎山中岑寂
恐未足復將江水遶山麓四無鄰家羣動息鐘聲鏗
鐘谷山谷烏鳶力薄墮中路惟有胡鷹石上宿誰知

江海多行舟遊人上下奈巖幽老僧心定身不定送
往迎來何時竟朝遊未厭夜未歸愛山如此如公稀
不待遊人盡歸去恐公未識山中趣

和子瞻焦山

金山遊遍入焦山舟輕帆急須臾間涉江已遠風浪
闊遊人到此皆爭還山頭冉冉萬竿竹樓閣不見門
長關金山共此一江水只有勝絕無此閑野僧終日
此一飯與世相視如髦蠻門無舟楫斷還往說法教
此龜鼉頑偶然客至話鄉國西望落日低銅鑲岷峨
在日入處想家積雪堆青藜稻田一頃良自給仕

宦不返知誰扳久安祿廩農事廢強弓一地無由彎
行逢佳處輒歎息想見茅屋藏榛菅我知此地便堪

隱稻苗旆旆魚斑斑

焦山長老
蜀僧也

次韻子瞻遊甘露寺

去國日已遠涉江歲將闌東南富山水跬步留清歡
遷延廢行邁忽忘身在官清晨涉甘露乘高棄征鞍
超然脫闐闐穿雲撫朱欄下視萬物微惟覺滄海寬
潮來聲洶洶望極空漫漫一一渡海船舶舟移檣竿
水恠時出沒羣嬉類猥獠幽陰自生火青熒復誰鑽
石頭古天險憑恃分權瞞疑城曜遠目來騎驚新觀

聚散定王業成毀猶月團金山百圍石岌岌隨濤瀾
猶疑漢官廷屹立承露盤狂波恣吞噬
嗟獨完
凝眸厭滉漾遶屋行盤跚此寺歷今古
迹皆龍鸞
孔明所坐石牀癡非人刊經霜衆草短積雨青苔寒
蕭翁嗜佛法大福將力于坡陀故鑊在甲錯蒼龍蟠
衛公秉節制佛骨埋金棺長松看百尺畫像留三歎
新詩語何麗傳讀紙遂刊嗟我本漁釣江湖心所安
方爲籠中閉仰羨天際搏遊觀惜不與賦詠嗟獨難
俸祿藉升斗齏鹽嗜鹹酸何時扁舟去不俟官長彈

李簡夫挽詞二首

老成渾欲盡吊客一潸然遺事人人記清詩句句傳
掛冠疎傳早樂世白公賢歎息風流在埋文得細鐫

其二

歸隱淮陽市遨遊十六年養生能淡泊愛客故留連
傾蓋知心晚論詩臥病前葆光塵滿榻無復聽談禪

次韻子瞻初到杭州見寄二絕

吏治區區豈不任吳中已自富才能還應占位書名
姓學取藍田崔縣丞

試盡風波萬里身到官山水却宜人君知晏子恩仍
厚還與從來舊卜鄰

和柳子玉地爐

鑿地泥床不費功山深炭賤火長紅擁衾熟睡朝衙
後抱膝微吟莫雪中寵辱兩忘輕世味冰霜不到傲
天工遙知麻步無人客寒夜清樽誰與同

和柳子玉紙帳

夫子清貧不耐冬書齋還費紙重重
惚明曉日從教入帳厚霜飈定不容
京兆牛衣聊可藉公孫布被旋須縫
吳綾蜀錦非嫌汝簡淡爲生要易供

次韻子瞻遊孤山訪惠懃惠思

烏依山魚依湖但有所有無所無
輕舟沿泝窮遠近肩輿上下更傳呼
翩然獨往不携孥兼擅魚鳥兩所
娛困依巖石坐巉絕行牽翠蔓隨
纏紆道逢懃思訪其廬誦詩清切
秋蟬孤隱居羞踏陌上土何人起
愛輪下蒲水南巷中羅百夫雞鳴
朝謁至日晡人生變化安可料憐
汝久遁終無圖鳧鷖不足鶴有餘
一俯一仰戚與嗟我久欲從逃遁
方圓不敢左右摹

宛丘二首并叙

宛丘城西柳湖累歲無水開元寺殿下山茶一株
枝葉甚茂亦數年不開轍頃從子瞻遊此每以二
物爲恨去秋雨雪相仍湖中春水忽生數尺至二

月中山茶復開千餘朵因作二詩奉寄

早湖堤上柳空多倚岸輕舟柰汝何秋雨連渠添積
潤春風吹凍忽生波蟲魚便爾來無數鳧雁猶疑未
肯過持詫錢塘應笑我坳中浮芥兩么麼

古殿山花叢百圍故園曾見色依依凌寒強比松筠
秀吐豔空驚歲月非冰雪紛紜真性在根株老大衆
園希山中草木誰攜種潦倒塵埃不復歸

贈提刑賈司門青

前年乘舟護南河死丘官舍酣且歌去年持節憂狂
獄驅車道路日不足今年春風塵土黃遠赴三州議

繇役天子憂民法令新整齊百事無閑人苗耘髮櫛

何時已回首昔遊如夢寐區區學舍曾未知春晚日

長唯有睡才智有餘安得閑疎慵顧我自當然喜君

未忘太平事獨稱赦書旌孝子

項城有孝子負土成墳賈移文陳州請用赦書存卹之

同陳述古舍人觀芍藥

藹藹堂西十畝園晚涼迺步綠陰繁共驚春去已多

日爭看花開最後番未許狂風催爛熳故將青幄強

安存請公作意勸歡賞趁取殘紅照酒樽

次韻子瞻見寄

我將西歸老故丘長江欲濟無行舟宦游已如馬
駝衰病擬學龜藏頭三年學舍百不與糜費廩粟
慙羞矯時自信力不足從政敢謂學已優閉門却掃
誰與語晝夢時作鈞天遊自從四方多法律深山更
深逃無術衆人奔走我獨閑何異端居割蜂蜜懷安
已久心自知彈劾未至理先屈餘杭軍府百事勞經
年未見持干旄賈生作傳無封事屈平憂世多離騷
煩刑弊法非公耻怒馬奔車忌鞭箠藐藐何自聽諄
諄諤諤未必賢唯唯求田問舍古所非荒哇弊宅今
餘幾出從王事當有程去須脯肉嫌無名掃除百憂
唯有酒未退聊取身心輕

趙少師自南都訪歐陽少師於潁州留西湖久
之作詩獻歐陽公

公居潁水上德與潁水清身閑道轉勝內足無復營
平昔富交遊開門坐常盈退居萬事樂獨恨無友生
汝潁亦多士後來非老成趙公平生平舊情好均弟兄
少年結意氣晚歲齊功名攜手踐廊廟躡足辭鈞衡
徜徉里閭間脫略世俗縈興來忽命駕一往千里輕
白髮儼相映元勳各崢嶸人生會面難此會有餘情
遨遊西湖中仲夏草木榮壺觴列四坐歌舞羅前楹

畫舫極泐沂肩輿並逢迎掉尾鳧鴨亂樂作蟲魚
近寺駢履迹高臺吹笑聲往事語京洛餘歡發吟磨
拳拳主人厚款款來客誠此樂有時盡此好何由傾

次韻子瞻望湖樓上五絕

欲看西湖兩岸山臥乘湖上木蘭船湖山已自隨船
改更值陰晴欲雨天

眼看西湖不擊來簿書無算撥還開二年屈指渾將
盡記取從今得幾回

湖山欲買恨無錢且盡芳樽對玉盤菱角雞頭應已
厭蟹螯馬頰更勤食

終日清漪弄短橈久忘車乘走翹翹秋風且食鱸魚
美洛下諸生未可招

滯留朝市常嫌開放棄江湖也未閑孤舫粗窮千頃
浪肩輿未盡百重山

和柳子玉共城新開御河過所居墻下

卜築共山功欲成新河入縣巧相縈誰將畚鍤千夫
力添上園林一倍清生長魚鰕供晚饌浮沉鷺鴨放
春聲爲鄰有意非今日巧我餘波伴濯纓

歐陽太師挽詞三首

雄文元命世直氣早成風受任衰遲後安邦反側中

迴天深有力扈聖耻言功事已身隨去驚嗟柱石空
其二

唐弊文初喪書成法至今雍容趨聖處深切可人心
氣力知難繼風流喜不淫懸知公欲謝異說勇交侵

其三

推轂誠多士登龍盛一時西門行有慟東閣見無期
念昔先君子嘗蒙國士知舊恩終未報感歎不勝悲

賦黃鶴樓贈李公擇

公擇時知鄂州

前年見君河之浦東風吹河沙如霧北潭楊柳強知
春樽酒相携終日語君家東南一氣清謫官河壩不

稱情一麾夏口亦何有高樓黃鶴慰平生荆江洞庭
春浪起漢沔初來入江水岸頭南北不相知惟見風
濤湧天地巫峽瀟湘萬里船中流鼓楫四茫然高城
枕山望如帶華榭照日光流淵樓上騷人多古意坐
忘朝市無窮事誰道武昌岸下魚不如建業城邊水
次韻子瞻餘杭法喜寺綠野亭懷吳興太守孫
莘老

信美非吾王三吳一水中亭高望已極舟入去無窮
朝市知安在湖山信有功遨遊逐鳥鳴飲食數魚蟲
波浪喧朝夕梅烝變綠紅逢人問京洛去國長兒童

同舍情相接鄰邦信屢通相邀欲相過道里訊溪翁
和子瞻宿臨安淨土寺

四方清淨居多被僧所占既無世俗營百事得豐贍
家居每紛薄奉養出寒欠昔年旅東都局促吁已厭
城西近精廬長老時一覘每來獲所求食飽山茶西臘
塵埃就湯沐垢膩脫巾韉不知禪味深但取飢腸饜
京城苦煩溷物景費治染吳都况清華觀刹吐光豔
石砭度空闊泉溜瀉深塹經過未足多終老應長歎
和子瞻自淨土步至功臣寺

山平村塢連野寺鐘相答晚陰生林莽落日猶在塔
行招兩社僧共步青山月送客渡石橋迎客出林樾
幽尋本直性往事聽徐說錢王方壯年此邦事輕俠
鄉人鄙貧賤異類識英傑立石象與王遺迹今岌業
功勳三吳定富貴四海甲歸來父老藏崇高畏摧壓
詩人巧譏病牛領恣挑抉流傳後世人談笑資口舌
是非亦已矣興廢何倉卒持歸問禪翁笑指浮漚沒
次韻子瞻遊徑山

去年渡江愛吳山忽忘蜀道輕秦川錢塘後到山最
勝下枕湖水相縈旋坐疑吳會無復有扁舟屢出凌
濤淵今秋復入徑山寺勢壓衆嶺皆摧顛連峰沓嶂

不知數重重相抱如青蓮散爲雲霧翳星斗聚作潭
井藏蜿蜒欽翁未到人迹絕千里受記來安禪荒榛
野草置茅屋坐令海賈輸金錢至今傳法破煩惱飽
食過客容安眠解裝投錫不復去紛紛四合來烏鳶
或言此處猶未好海上人少無煩煎天台鴈蕩最深
秀水驚石瘦尤清便青山獨往無不可論說好醜徒
紛然終當直去無遠近藤鞋竹杖聊窮年

次韻子瞻自徑山回宿湖上

朝從徑山來泱莽徑山色莫從湖上歸滉漾湖光碧
借問泛湖舟何似登山屐高懷厭朝市遠去忘憂慄
日向幽人青顏從濁醪赤塵埃解羅網宇宙爲安宅
油然了無營此意誰能詰嗟子別離久欲徃徒反側
留滯亦何爲空驚突深黑

次韻子瞻題孫莘老墨妙亭

高岸爲谷谷爲陵一時豪傑空飛騰身隨造化不復
返忽若野雀逢蒼鷹當年碑刻最深固風吹土蝕消
無稜遺文漫滅雨中迹翠石斷裂春後冰古墳欲毀
野廟廢行人不去征鞍憑書生耽翫立風雪飢驢厭
苦疲奴憎愛之欲取恨無力旋揉翠墨濡黃繒不如
好事孫太守牛車徒置華堂登遶墻羅列耀珪璧罷

燕起讀留賓朋却思遺迹本安在原隰處處荒榛藤
田夫野老誰復顧鬼火夜照來寒燈廢興聚散一如
此反使涕泗沾人膺

熙寧壬子八月於洛陽妙覺寺考試舉人及還
道出嵩少之間至許昌共得大小詩二十六首

洛陽試院樓上新晴五絕

縹緲危譙面面山朝來雲作雨潺潺忽然風卷歸何
處百里陰晴反掌間

嵩少猶藏薄霧中前山迤邐夕陽紅高樓一閉三十
日遙憶巖頭種藥翁

伊闕遙臨鳳闕前龍門女兒氣蒼然唐朝御路依稀
在猶想東巡塵暗天

天壇王屋北侵河高比嵩丘一倍多小有清靈今尚
在俗緣深重柰成魔

前朝宮闕倚芒山殿閣層層半嶺間猶恐北來岡阜
淺太行東抱故孱顏

和頓主簿起見贈二首

聲病消磨只古文諸儒經術鬪紛紜不知舊學都無
用猶把新書強欲分老病心情愁見敵少年詞氣動
干雲搜賢報國吾何敢欲補空疎但有勤

一鎖樓中暗度秋微官黽勉未能休笑談容我聊紓
放文字憑君便去留杯酒淋漓已非敵清詩窈眇更
難酬東歸猶得聯征騎同上嵩高望九州

將出洛城過廣愛寺見三學演師引觀楊惠之

塑寶山朱瑤畫文殊普賢爲賦三首

寺古依喬木僧閑正莫年爲生何寂寞愛客尚留連
虛牖羅脩竹空厨響細泉坐聽談舊事遍識洛中賢

其二

虛室無尋丈青山有百層迴峰看不足危石恐將崩
聽法來天女依巖老梵僧須彌傳納芥觀此信還曾

其三

壁毀丹青在移來殿廡深賦形驚變態觀佛覺無心
旌旆翻空色笙竽含妙音風流出吳樣遺法到如今

登封道中三絕

緱山祠

飛仙不返周王子重阜相連少室孫夜靜笙聲兼鶴
下迴看惟有故山存

輟轅道

青山欲上疑無路澗道相縈九十盤東望嵩高分草
木回瞻原隰湧波瀾

少林寺贈頓起

一徑喬林下黃葉三山翠壁遶禪居共君將住還歸

去欲問安心知已疎

少林東接少室北倚石城南臨鳳凰山鳳凰山上有初祖庵二

祖問法於此

登嵩山十首

石徑

蒼壁上參天微徑隨流水聲牙石齒亂紛薄黃葉委
牽攀不得上顛仆幾將止勉強終此行更老知難至

王女窻

巖竇有虛明矐矐發晴曉真人無傳匹牕下晨粧早

門開秋雨入室靜長風掃絕跡杳難尋朱顏未嘗老

擣衣石

玉女雲為衣飄搖不須擣空傳巖下石夜杵知誰抱

清泉供澣濯素月鋪繒綺人世迫秋寒處處砧聲早

醒心泉

上山苦飢渴中道得寒泉舉瓢石竇響入口煩痾痊

湫流去不見落澗聲鏘然莫歸復相值相從下平川

峰頂寺

重重山前峯上上終非頂行登衆嶺徹始得山門迥

高風慘多寒落日側先暝却視向所經眇如在深井

登封壇

登封事已遙大碑摧風雨靈壇久銷禿古木中梁柱
峰巒至此盡蒼石無寸土俯視萬仞高悲辛但狂顧

法華巖

飛橋走巖居茅屋今已破何年避世僧此地常獨臥
秋風高鳥入夜月寒猿過自非心已灰靜極生悲情

將軍栢

在天封觀觀
即唐避暑宮

肅肅避暑宮石殿秋日冷凜然中庭栢氣壓千夫整
風聲谷萬壑雲色通諸嶺材大難為工甘與蓬蒿屏

吳道子畫四真君

在精
思觀

浮埃古壁上蕭然四真人矯如雲中鶴猶若畏四鄰
坐令世俗士自慙汗濁身勿謂今所無嵩少多隱淪

吳道子畫四真
君在精思觀

啓母石

神夫化黃熊神母化白石嬰兒剖還父涕泣何暇卹
爾來三千歲往事誰復識惟有少姨存相望居二室

過韓許州石淙莊

水中有石曰淙唐天后朝
常燕羣臣於此石刻尚在

飛泉來無窮發自嵩嶺背奔馳兩山間偶與亂石會
傾流勢摧毀泥土久崩潰堅姿未消釋截薛儼相對
居然受噴潑雷轉諸壑內初喧墮深谷稍放脫重隘

跳沫濺霏微餘瀾洶澎湃宸遊昔事遠絕壁遺刻在
人迹久寂寥物理係興廢相君厭紛華築室俯湍瀨
濯纓離塵垢洗耳聽天籟將追赤松遊自置青雲外
道人亦何者預此事歸計猶恐山未深更種萬株檜

過登封閻氏園

秋暑尚煩襟林泉淨客心菊殘知節過荷盡覺池深
疎柳搖山色青苔遍竹陰猶嫌近官道輾輓聽車音

許州留別頓主簿

洛寺相從不出門遶城空復記名園程文堆案晨興
早竹簟連床夜語喧歸路逢僧整容與登山無力強

扳援遙知別後都如夢願有君詩一一存

次韻子瞻登望海樓五絕

山色潮聲四面來城中金碧爛成堆不愁門外嚴扃
鎖終日憑欄未擬迴

湖色蒼蒼日向斜煙波萬狀不容誇畫船人去浮紅
葉石徑僧歸躡白蛇

樓觀爭高不計層噫噫過鴈自相磨錢王舊業依稀
在歲久無人話廢興

荷葉初乾稻穗香驚雷急雨送微涼晚晴稍放秋山
色洗却濃粧作淡粧

白酒傾漿膾斫紅晝遊未厭月明中
樓高只辦聽歌鼓不見遊人轉似蓬

和子瞻監試舉人

登科歲云徂舊學日將落外遭饑寒侵內苦憂患鏢
傳家足墳史遺說本精約群言久紛蕩開卷每驚矍
居官忝庠序授業止于簞朝廷發新令長短棄前襲
緣飾小學家睥睨前王作聲形一分解道義因附託
安行衢路強挽就縻縛縱橫施口鼻爛熳塗丹堊
心橫流漂蕩終安泊憶惟法初傳欲講面光怍
勸多士從者盡高爵徘徊始未信街誘終難却

嗟哉守愚鈍幾不被譏詭獨醒慙舖糟未信耻輕諾
敢言折鋒鏃但自保城郭有司顧未知選試謬西洛
羣儒誰號令新語競投削雖云心所安恐異時量度
詭遇便巧射晚嫁由拙灼誰能力春耕忍饑待秋穫
聞兄職在監考較筆仍閣縮手看傍人此意殊未惡

和子瞻煎茶

年來病懶百不堪未廢飲食求芳甘煎茶舊法出西
蜀水聲火候猶能諳相傳煎茶只煎水茶性仍存偏
有味君不見閩中茶品天下高傾身事茶不知勞又
不見北方俚人茗飲無不有鹽酪椒薑誇滿口我今

倦遊思故鄉不學南方與北方銅鑄得火蚯蚓叫匙
脚旋轉秋螢光何時茅簷歸去炙背讀文字遣兒折
取枯竹女煎湯

次韻子瞻對月見憶并簡崔度

先師客陳未嘗飽弟子于今敢言巧敗牆破屋秋雨
多夜視陰精過畢昂壑鹽冷落空盃盤且依道士修
還丹丹田發火五臟暖未補漫漫長夜寒我生疲鴛
戀笙豆崔翁遊邊指北斗唯有王江亦未歸閉門無
客邀沽酒

死丘道人王江好飲酒
去冬游沈丘遂不歸

和子瞻開湯村運鹽河中督役

興事常苦易成事常苦難不督雨中役安知民力殫
年來上功勲智者爭雕鑿山河不自保疏鑿非一端
譏訶西門豹仁智未得完方以勇自許未卹衆口歎
天心閔劬勞雨涕為洗瀾不知泥滓中更益手足寒
誰謂邑中黔鞭箠亦不寬王事未可回后土何由乾

次韻子瞻雨中督役夜宿水陸寺二首

雲氣連山雨瀉盆莫投僧舍欲關門暫時洒掃寬行
役終夕崎嶇入夢魂煩熱暗消秋簟冷烝濡未解夜
燈昏二年游宦多勞苦何日相從得細論

野寺蕭條厭客喧雨披修竹亂紛然已因無食聊從

仕深悟勞生不問禪未至莫憂明日事偷閑且就此
宵眠天明歸去芒鞋滑雖有藤輿懶上肩

次韻子瞻將之吳興贈孫莘老

宦遊莫向長城窟冬冰折膠弦亦絕吳中臘月百事
便蟹煮黃金鱸膾雪京城舊友一分散近憶吳興須
滿頰世事反復如翻飛今日共鯨前益垂畏人但恐
去不遠適意未覺歸來遲借問校讐天祿閣何如江
海同遊嬉

和子瞻畫魚歌

吳人以長釘加杖頭以杖畫水取魚謂之畫魚

潛魚在淵安可及垂餌投竿易如拾橫江設網雖不
仁一瞬未移收百十畫魚何者漫區區終日辛勤手
枯槁已嫌長網不能遍肯信一竿良有餘鯤鯢駭散
蛟龍泣獲少驚多亦何益願從網罟登君庖碎首屠
鱗非所惜

樂城集卷之五

宋 西蜀蘇轍子由著

明 東吳王執禮子敬校

詩六十六首

次韻子瞻吳中田婦歎

久雨得晴唯恐遲
 既晴求雨來何時
 今年舟楫委平地
 去年簑笠為裳衣
 不知天公誰怨怒
 棄置下土塵與泥
 丈夫強健四方走
 婦女齷齪將安歸
 塌然四壁倚機杼
 收拾遺粒吹糠粃
 東鄰十日營一炊
 西鄰誰使救汝饑
 海邊唯有鹽不旱
 賣鹽連坐收嬰兒
 傳聞

四方同此苦不關東海誅孝婦

次韻子瞻遊道場山何山

兩山相負爲峯麓流水重重注溪谷遊人上尋流水
源未覺崎嶇病雙足山深下視雲漫漫徑垂石底千
屈盤松林陰森白日靜忽驚人世如奔湍客行不避
苦寒出僧定端居不下席人生嗟與草木同置身所
在由初植堂中白佛青髻髮氣象冲淡非人間坐令
遠客厭奔走徑欲築室依空山木魚根根夜將旦星
斗歆斜掛山半行役有程未可留將出山門復長歎

癸丑二月重到汝陰寄子瞻二首

憶赴錢塘九月秋同來潁尾一扁舟退居尚有三師
在好事須爲十日留傾瀉向人懷抱盡忠誠爲國始
終憂重來東閣皆塵土淚滴春風自不收

百頃西湖十里源近依城郭帶川原古臺駮賊先臨
水野寺參差半掩門遠泛便成終日醉幽尋不盡數
家園錢塘未到能先說更着青山兩岸屯

次韻子瞻二月十日雪

春雪漫天密又稀勾芒失據走靈威故欺貧窶冬裘
盡巧助遨遊酒盞飛林下細花添百草堦前輕素剪
新機老農先解憂桑柘九月家人當授衣

和子瞻題風水洞

風送江湖蒲洞天洞門可聽入無緣土囊鬱怒聲初
散石齒聳牙勢未前樂奏洞庭真跌宕歌傳帝所亦
清便何人隱几觀遺韻重使顏成問豁然

次韻子瞻新城道中

春深溪路少人行時聽田間耒耜聲飢就野農分餉
黍邈嫌尉卒鬧金鉦閑花開盡香仍在白酒沽來壓
未清此味暫時猶覺勝問兄何日便歸耕

次韻子瞻山村五絕

山行喜遇酒旗斜無限桃花續杏花與世浮沉真避

世將家漂蕩似無家

塍間白水細無聲日暖泥融草不生似恐田家忘帝
力多差使者出催耕

旋春紅稻始經鎌新煮黃雞取次甜無慕無營人自
樂莫將西子愧無鹽

升平事業苦忽忽未信浮名到底空何用橐駝朝塞
外試聽碌軸語場中

貧賤終身未要羞山林難處便堪愁近來南海波尤
惡未許乘桴自在遊

次韻子瞻遊富陽普照寺

塵埃日已遠斗數更無餘寺到逢門入詩成信手書
山深僧自樂路遠客終疎訪盡前朝景佗年一告予

次韻子瞻自普照入山獨遊二庵

披榛入山山路細鐘聲出寺門將閉石苔冉冉上芒
鞋草露溥溥著衣袂野人茅茨苦竹屋終身局促無
生計天公未省長困人春田米盡秋田繼老妻稚子
亦自樂野草山花還插髻長笑人間醉未醒終老辛
勤漫欺世

次韻子瞻與蘇世美同年夜飲

晚歲事遊宦相從未嘗足羨君四海皆兄弟棧中直

木不容曲臨安老令况同科相逢豈厭樽中醪潦倒
誰憐澗底松歲寒尚有霜前竹聞道渠家八丈夫它
日歸耕免幽獨

次韻子瞻病中遊虎泉僧舍二首

掃地開門松檜香僧家長夏亦清凉公庭多事久來
厭靜處安眠計甚長修竹填牕藤簟綠白蓮當戶石
盆方香厨晚飯紅粳熟忽憶烹雞田舍嘗

澗谷新晴草木香野情蕭散自生涼雨添山色翠將
溜日轉松陰晚更長病客獨來唯有睡遊僧相見亦
它方還家煩熱都消盡不信醫王與藥嘗

和子瞻東陽水樂亭歌

君不見武安前堂立曲旃官高利厚多憂患又不見
夏侯好妓貧無力簾箔爲衣人莫識兩人操行雖不
同辛苦經營實如一不如君家激水石中流聽之有
聲百無憂笙竽窈眇度溪谷琴筑淒咽穿林丘高人
處世心淡泊衆聲過耳皆爲樂退食委蛇石上眠幽
音斷續床前作正如古人樂易多歡娛積土爲鼓塊
爲桴但能復作太古意君家水樂真自餘

次韻子瞻有美堂夜歸

飲闌鐘虛欲移軒香霧猶殘金博山明月飛來松嶺
外遊人散落馬蹄間城嚴畫鼓初傳角路暗山花自
落鬟清境暫時都不見夜深人盡始來還

次韻子瞻祈雨

世故紛紛誰復閑蛟龍不雨獨安眠人間已厭三秋
旱澗底猶慳一掬泉廟令酒肴時醉飽田家糠粃久
安便憂心未已誰知卹更把爐香試一燃

次韻子瞻再遊徑山

我兄東南遊我亦夢中去徑山聞已款徃意穿雲霧
夢經山前溪足冷忽先渡舉頭雲峰合到寺霜日莫
香厨饌巖菽野徑踏藤屨平生共遊處蹇足躡高步

欒城集 卷之五 三百三十一部
崎嶇每生胝眩晃屢回顧何年棄微官攜手衆山路

得此詩後夢與凡同遊山中故爲此篇

王仲儀尚書挽詞

謝公德業久彌新幼度英奇也絕倫父子俱賢真不朽功名自致豈相因邊兵屢動思良將廷論蕭條憶諍臣青史世家它日事新阡宿草倍沾巾

次韻范景仁侍郎移竹

雙檜生南戶叢筠種北牆交陰奉君子爲伴老中堂露洗秋堦綠風含夏簟涼栽花知己誤新上一番霜

寄題蒲傳正學士閬中藏書閣

朱欄碧瓦照山隈竹簡牙籤次第開讀破文章隨意得學成富貴逼身來詩書教子真田宅金玉傳家定糞灰更把遺編觀得失君家舊物豈須猜

自陳適齋戲題

庠齋三歲最無功羞愧宣王祿萬鍾猶欲談經誰復信相招執籥更須從陳風清淨眠真足齊俗彊梁懶不容久爾安閑長自怪此行磨折信天工

送董湯休比部知真州

奏課西南最分符江海衝往來觀惠術蟠錯試餘鋒文字從堆案罇壘彊解容金山只隔水時復聽晨鐘

送排保甲陳祐甫

我生本西南爲學慕齊魯從事東諸侯結綬濟南府
誰言到官舍旱氣裂后土饑饉費困倉剽奪驚桴鼓
緬焉禮義邦憂作流亡聚君來正此時王事最勤苦
驅馳黃塵中勸說野田父穰穰百萬家一一連什伍
政令當及期田閭貴安堵歸乘忽言西劬勞共誰語
送韓祗嚴戶曹得替省親成都

宦遊東土暫相依政役頻煩會合稀每恃詳明容老
病不堪羈旅送將歸思親道路寧論遠入蜀山河漸
覺非我有舊廬江水上因君聊復夢魂飛

和孔教授武仲濟南四詠

環波亭

南山迤邐入南塘北渚岩峩枕北牆過盡綠荷橋斷
處忽逢朱檻水中央鳧鷖聚散湖光淨魚鱉浮沉瓦
影涼清境不知三伏熱病身唯要一藤床

北渚亭

西湖已過百花汀未厭相携上古城雲放連山瞻嶽
麓雪消平野看春耕臨風舉酒千鐘盡步月吹笳十
里聲猶恨雨中人不到風雲飄蕩恐神驚

鵲山亭

築臺臨水巧安排萬象軒昂發瘞埋南嶺崩騰來不
盡北山斷續意尤佳平時戰伐皆荒草永日登臨慰
病懷更欲留詩題素壁坐中誰與少陵偕

檻泉亭

連山帶郭走平川伏澗潛流發湧泉洶洶秋聲明月
夜蓬蓬曉氣欲晴天誰家鷺鴨橫波去日暮牛羊飲
道邊滓穢未能妨潔淨孤亭每到一依然

踏藕

春湖柳色黃宿藕凍猶僵翻沼龍蛇動撐船牙角長
清泉浴泥滓粲齒碎冰霜莫使新梢盡炎風翠蓋涼

和李誠之待制燕別西湖

并叙

熙寧六年九月天章閣待制李公自登州來守此
邦愛其山川泉石之勝怡然有久留之意此邦之
人安公之惠亦欲公之久於此也然自其始至而
民知其方將復用懼其不能久矣明年二月詔書
移牧河間邦之父兄皆惜其去雖公亦將留焉而
不可得也於是數與其僚燕於湖上曰北方幸安
余將復老於此酒酣賦詩以別從而作者三人公
平生喜爲詩所至成編及來此邦而未嘗有所爲
故尤貴之遂相與刻於石以慰邦人之思焉

東來亦何恃夫子此分符談笑萬事畢樽壘衆客俱
高情生遠岫清興發平湖坐使羈遊士能忘歲月徂
縱歡真樂易恨別不須臾廟幄新謀帥河間最近湖
安邊本餘事清賞信良圖應念茲園好流泉海內無
送李誠之知瀛州

少年學詩書晚歲探至道豈伊封疆臣乃是廊廟寶
苦恨富貴遲聲名得空早憶惟西羌桀始建元戎纛
恩威炳朝日號令靡秋草功勳不容究孤高易摧倒
歸來易三邦但養胃中顛寧知北邊將還須用耆老
春風吹旌旆先聲遍城堡往事安足懲遺黎待公保

西湖二詠

觀捕魚

西湖不放長竿入羣魚空作淘河食漁人攘臂下前
汀蕩漾清波浮兩腋藕梢菱蔓不容網箔作長圍徒
手得逡巡小舟十斛重踴躍長魚一夫力柳條穿頰
洗黃金鱸縷堆盤雪花積燒薤香橙巧相與白飯青
蔬甘莫逆食罷相携堤上步將散重煎葉家白人生
此事最便身金印垂腰定何益

食雞頭

芡葉初生縹如縠南風吹開輪脫轂紫苞青刺攢蝟

毛水面放花波底熟森然赤手初莫近誰料明珠藏
滿腹剖開膏液尚模糊大盃磨聲風雨速清泉活火
曾未久滿堂坐客分升掬紛然咀噍惟恐遲勢若羣
雛方脫粟東都每憶會靈沼南國陂塘種尤足東遊
塵土未應嫌此物秋來日嘗食

次韻孫推官朴見寄二首

蒙愠未能憂悄悄得閑時復醉昏昏知君亦學無言
語豈悟維摩不二門

病懶近來全廢學宦游唯是苦思鄉粗知會計猶堪
仕貪就功名有底忙懷舊暗聽秋鴈過夢歸偏愛曉
更長故人知我今何念擬向東山賦首章

送張正彥法曹

憶見君兄弟相携謁侍郎通經誇早歲落筆盡成章
試劇何輕銳當官便激昂三年知力竭大府覺才長
知己未如格歸貴纔滿囊舊書還讀否師說近淒涼

君以三傳及
第今廢此科

送青州簽判俞退翁致仕還湖州

不作清時言事官海邦那復久盤桓早依蓮社塵緣
少新就草堂歸計安富貴暫時朝露過江山故國水
精寒宦游從此知多事收取楞伽靜處看

和青州教授頌起九日見寄

歲月飄然風際煙紫萸黃菊又霜天莫思太室杉松

外且醉青州歌舞前昔年與頌君同登杯酒追歡真

一夢天涯回望正三年近來又欲東觀海聽說毛詩

雅頌篇君善講詩

題徐正權秀才城西溪亭

竹林分徑水通渠真與幽人作隱居溪上路窮惟畫

舫城中客至有曾魚東來只為林泉好野外從教簿

領疎不識徂徠石夫子兼因女婿覓遺書徐生石介女婿也

和子瞻喜虎兒生

生男如狼猶恐延寅年生虎慰爺孃汝家家世事文

史門戶豈有空剛強試看猛虎在山谷斧牙鈎爪旗

尾揚徐行當道擇牛羊狐狸驚走熊豬忙我今老病

思退藏生子安得尚激昂不見伯父擅文章逡巡議

論前無當

次韻子瞻病中贈提刑段繹

京東分東西中劃齊魯半兄來本相從路絕一長嘆

前朝使者還手把新詩玩憐我久別離卷帙為舒散

誰言窮陋邦得此唱酬伴相逢傾蓋間晤語何旦旦

宦遊少娛樂纏縛苦文案能於王事餘時作楚詞亂

臂如近膏油未肯忘濯盥賢豪真勉強功業畏繚緩
 伊余獨何為舊籍西南貫竊祿未遑歸自笑嗟已懦
 方當四海寒戀此一寸炭主勸客欲留逡巡要奪館
 柰何獨見收軟言強温煖此意定難酬還予授子粲

次韻子瞻賦雪二首

麥苗出土正纖纖春早寒官令尚嚴雲覆南山初半
 嶺風乾東海盡成鹽來時瞬息平吞野積久歆危欲
 欺簷強付酒樽判醉熟更尋詩句鬪新尖
 點綴偏工亂鵠鴉淹留欲解惱船車乘春已覺矜餘
 力騁巧時能作細花殭鴈墮鴟誰得罪敗墻破壁若

為家天公愛物遥憐汝應是門前守夜叉

是歲京師雪尤甚鴟

為凍死如積

次韻韓宗弼太祝送遊太山

羨君官局最優游笑我區區學問囚今日登臨成獨
 往終年勤苦粗相酬春深綠野初開繡雲解青山半
 脫裘回首紅塵讀書處煮茶留客小亭幽

次韻劉敏殿丞送春

春去堂堂不復追空餘草木弄晴暉交遊歸鴈行將
 盡蹤跡鳴鳩懶不飛老大未須驚節物醉狂兼得避
 危機東風雖有經旬在芳意從今日日非

四月十一日立夏

次韻趙至節推首夏

首夏尋芳也未遲，遶園紅紫尚非非。無心與物真皆
可有，酒逢人勸莫違。夢逐楊花無限思，身慙啼鳥不
如歸。官居寂寞如僧舍，海燕憐貧故入扉。

次韻李昭叙供備燕別湖亭

池亭雨過一番涼，雲髻羅裙客兩旁。不覺行人離恨
遠，貪看積水照筵光。蒲堂樽俎歡方劇，極目江湖意
自長。歸去伊川瀟灑地，不須遺念屬清湘。

送李昭叙移黎陽都監歸洛省親

與君非舊識，傾蓋便相親。共事林泉郡，忘歸南北人。

煮茶流水曲，載酒後湖濬。未覺遊從厭，空驚別恨新。
瀕河今重地，知己舊元臣。洛下聞雞犬，家書不浹旬。
西還倚門罷，北渡羽書頻。忠孝傳家事，風流待一振。

遊太山四首

初入南山

自我來濟南，經年未嘗出。不知西城外，有路通石壁。
初行澗谷淺，漸遠峰巒積。翠屏互舒卷，耕耨隨歆側。
雲木散山阿，逆旅時百室。茲人謂川路，此意屬行客。
久遊自多念，忽誤向所歷。嘉陵萬壑底，棧道百迴屈。
崖巘通崢嶸，征夫時出没。行李雖云艱，幽邃亦已劇。

坐緣斗升米被此塵土厄何年道袞斜長嘯理輕策
四禪寺

山蹊容車箱深入遂有得古寺依巖根連峰轉相揖
樵蘇草木盡佛事亦蕭瑟居僧麋鹿人對客但羞澁
雙碑立風雨八分存法則云昔義靖師萬里窮西域
華嚴貝多紙歸來手親譯蛇骨儼未移至今存石室
遺文盡法界廣大包萬億變化浩難名丹青盡京邑
粲然共一理眩晃莫能識末法漸衰微徒使真人泣

靈巖寺

青山何重重行盡土囊底巖高日氣薄秀色如新洗

入門塵慮息盥漱得清泚高堂見真人不覺首自稽
祖師古禪伯荆棘昔親啓人跡尚蕭條豺狼夜相舐
白鶴導清泉甘芳勝醇醴聲鳴青龍口光照白石陞
尚可滿畦塍豈惟濯蔬米居僧三百人飲食安四體
一念但清涼四方盡兄弟何言庇華屋食苦當如薺

嶽下

東來亦何求聊欲觀海岱海西尚千里將行勇還退
岱陰卽齊疆南往曾歷塊春深草木長山暖冰雪潰
中巷無居人南畝釋耕耒車徒八方至塵坌百里內
牛馬汗淋漓綺紈聲絳繅喧闐六師合洶湧衆流匯

無復問誰何但自舍耽愛龍鸞畫車服貝玉飾冠佩
驂騮蹴騰騫幡旆飛晻曖腥羶及魚鼈瑣細或蒲菜
遊墮愧無齋技巧窮殊態縱觀睥未已精意殫一酌
出門青山屯遶廊遺迹昧登封尚壇壝古觀寫旗隊
戈矛認毫末舒卷分向背雍容太平業磊落豐碑在
往事半蓬蒿遺氓但悲慨回瞻最高峰遠謝徂徠對
欲將有限力一放目所追天門四十里預恐雙足廢
三宿遂徘徊歸來欲誰對前年道輾轅直上嵩嶺背
中休強飲食莫宿時盥頰稍知天宇寬不覺人寰穢
歲時未云久筋骸老難再山林無不容疲薺坐自礙

自知俗緣深畢老守闔闔何當御清風不用車馬赴

送王璋長官赴真定孫和甫辟書

昔年旅南服始識王荊州威動千里肅恩寬行客留
從容見少子風采傾凡儔温然吐詞氣已覺清且修
不見十五年相逢話百憂青衫走塵土白髮各滿頭
新棄東海邑願從北諸侯北鄙事方夥饑饉連戈矛
盟好未可輕念當事懷柔玉將今老成勉盡良計籌

寄孫朴

憶昔補官太皞墟泮宮蕭條人事踈日高鼾睡聲噓
噓往還廢絕門無車君爲戶曹畏簡書放懷疎懶亦

似余相逢語笑夜躊躇烹煮梨栗羞殺蔬官居一去
真遽廬東來失計悔厥初夜聞桴鼓驚閭閻事如牛
毛費耘鋤違失真性從吏胥目視紵臂邀徐徐羨君
不出心自如北潭秋水多芙蓉青荷包飯蒲爲菹修
然獨往深淵魚人生如此樂有餘胡爲自投檻中狙
和韓宗弼暴雨 次韻

執熱臥牀窓淋漓汗流注蛟龍遁水府誰起叩天戶
偶然終日風振擾北山霧崩騰轉相軋變化不容睹
雷聲運車轂雨點傾豆黍逡巡溜河漢指顧纔一語
破屋少乾床茅苫固難禦出門泥沒足此厄也
苟令終歲熟敢有今日怒晚照上東軒清風襲虛廡
微生免荷鋤但喜脫煩暑農父更事多缺塘已增土

舜泉復發

奕奕清波舊遶城早來泉眼亦塵生連宵暑雨源初
接發地春雷夜有聲復理溝渠通屈曲重開池沼放
澄清通衢細灑浮埃淨車馬歸來似晚晴

次韻徐正權謝示閔子廟記及惠紙

西溪秋思日盈牋幕府拘愁學久騫記廟終慙無好

句醉墳猶喜有前篇

生先作祭閔子文

屏除筆硯真良計寫

寄交遊畏妄傳吳紙贈君君莫恠耕耘廢罷有閑田

張文裕侍郎挽詞

持節西南二十年華堂遺像已蒼然歸來侍從三朝
舊老去雍容平地仙落筆縱橫題壁處誦詩清壯舉
杯前東游邂逅迎歸旆淚落城南下馬阡

東方書生行

東方書生多愚魯閉門誦書口生土窓中白首抱遺
編自信此書傳父祖辟雍新說從上公冊除僕射酬
元功太常弟子不知數日夜吟諷如寒蟲四方窺覘
不能得一卷百金猶復惜康成穎達棄塵灰老聃瞿
曇更出入舊書句句傳先師中途欲棄還自疑東鄰

小兒識機會半年外舍無不知乘輕策肥正年少齒
疎脣腐真堪笑是非得失付它年眼前且買先騰蹕

送韓宗弼

大野將凍河水微慨然臨流送將歸登舟上帆手一
揮脫棄朋友如弊衣我來三見芳草腓來時同寮今
已非念昔相從未嘗違西湖幽遠人事稀青蓮紫芡
傾珠璣白魚掉尾黃鼈肥客醉將起命闔扉方橋月
出風露霏星河下照搖清輝喧呼笑語相嘲譏歲月
一逝空長歛交遊去盡將誰依君家漢代平與韋藹
然令德傳餘微鳴鳩著地鴻高飛安得久此同縶鞿

送劉長清敏

汝州太守臥病年疊疊猶復能清言平生雄辯嗟不見風流尚有曹州存歷下東遊少相識歡喜聞君在西邑舊知兄弟無凡儔相逢一笑開顏色三年政令如牛毛思歸南畝皆蓬蒿羨君飲酒動論斗引觥向口收狂潮醉後胷中百無有偃然嘯傲傾朋曹中朝卿士足官府君歸何處狂謔謔

劉原甫自長安病歸余始識之

汝尚將歸吳興齊州記室蘇子由辱詩爲送因逐韻謝之云

釋屣從軍蚤濫官已衰能復尚盤桓邇來齒髮羞相

問乞有衡茅覓自安使我襟懷遺內熱誦君詩句襲人寒知誰便是知音者且作巖溪雪景看

高祖郎中頊蒙以御史召力辭不允解組而歸先生作是詩以送之高祖溪堂集中亦嘗賡和淳熙丁未激假守筠陽謹刊篇末

亦嘗覽味形器一未
 而體此主外具詩以詩之
 高師河中取譽
 以清其俗之
 兼人寒吟
 且非
 問之

樂城集卷之六

宋 西蜀蘇轍子由著

明 東吳王執禮子敬校

詩一百首

題張安道樂全堂

天命無不全人事每自傷譬如摩尼珠宛轉有餘光
 藻飾不能加塵垢豈有亡世人未嘗識姑射手自將
 我公體自然率性非勉強馳驅四十年不入憂患場
 晚歲事蒙養歛退就此堂小儒豈知道宿昔窺門牆
 申屠師無人無足亦自忘如逢鄭執政一笑先生傍

和鮮于子駿益昌官舍八詠 梓廬一笑去坐對
桐軒 桐軒 桐軒 桐軒 桐軒 桐軒 桐軒 桐軒 桐軒 桐軒
桐身青琅玕 桐葉蒲葵扇 落落出軒墀 亭亭奉閒燕
夜聲疎雨滴 午影微風轉 秋飈未凌亂 浙瀝驚葱蒨
朝日失繁陰 青苔覆遺片 空使坐中人 慨然嗟物變
幽軒離紛華 惟有一叢竹 纖梢起餘寒 紫筍散輕馥
擢榦春雨餘 挺節秋霜足 不知歲時改 守此娟娟綠
上有吟風蟬 空腹未嘗食 翦伐非所辭 不受塵土辱

栢軒

築室城市間 移栢南澗底 山林夙所尚 封植聊自寄
崎嶇脫巖石 擁塞出芴翳 上承清露滋 下受寒泉惠
秋來采霜葉 咀嚼有餘味 苦澁未須嫌 愈久其如薺

巽堂

山前三秦道 車馬不遑息 日出紅塵生 不見青山色
峰巒未嘗改 徃意自奔迫 誰言幽堂居 近在使者宅
俯聽辨江聲 却立睨石壁 藤蘿自太古 松竹列新植
暑簟臥清風 寒樽對佳客 試問東行人 誰能同此適

山齋

平地厭喧囂 虛齋上山足 蕭條遠城市 坡陀富林麓

簡書日填委杖屨每幽獨豈無山中士高臥白茅屋
逢人默無語長嘯響巖谷此室庶可招夜月相從宿

閑燕亭

登山稍已高曠望良亦遠危亭在山腹物景行自變
諸峰宿露收草木朝陽絢益益雲出山溜溜泉垂坂
徐行得佳處永日遂忘返此樂只自知傍人任嫌懶

會景亭

亭高衆山下勝勢不自收罔巒向眼盡風籟與耳謀
鳶飛半嶺息雲起當空遊視身如乘風超然忘百憂
暮歸室中居唯見窻戶幽視聽隨物變恍誰識其由

寶峰亭

昔過益昌城莫登君子堂駕言念長道未暇升崇岡
今聞寶峰上縹緲陵朝陽三休引蘿蔓一覽窮蒼茫
微雲靄雙劍落日明故鄉奔馳迹未安山藪意自長
漂搖萬里外手把新詩章宦遊不忘歸何異鳥欲翔
塵土汗顏面年華侵鬢霜何時首歸路所至聊徬徨
樽俎逢故人亭榭凝清光爲我具斗酒宿恨猶可償
次韻分司南京李誠之待制求酒二首

世上升沉都夢裏春來疆健鬪樽前公田種秫全拋
却坐客無氈誰與錢

春深風雨半相和節物令人意緒多中酒何須問賢
聖和詩今尚許羊何

送施歷城辯歸常州

高人不愛塵土侵三年浙江藏何深久閑物理有相
復歷城官事森成林乘時歛散逐十二鞭撻適負徒
哀矜一杯相屬未嘗得百畝歸去將安能潛逃雖出
知者後黽勉尚見仁人心歸期忽告三月尾強留不
顧千黃金河豚雖過鱸鯪在粳稻正插風雨淫酒肴
勞苦罄隣里期會迫隘思僚朋山川吳越我所愛扁
舟佗日要追尋滯留未用便相詫半年歲月行駸駸

施君既去復以事還戲贈

令尹西行去又迴西湖重把舊樽壘吏民再見雞棲
乘猶道吾公挽不來

和文與可洋州園亭三十詠

湖橋

湖南堂宇深湖北林亭遠不作過湖橋兩處那相見

橫湖

湖裏種荷花湖邊種楊柳何處渡橋人間是人間否

書軒

綠竹覆清渠塵心日日疎使君遺癖在苦要讀文書

冰池

水深冰亦厚澆蕩鋪寒玉好在水中魚何愁池上鷺

竹塢

空陂放修竹蕭蕭復冥冥莫除塢外筍從使入園生

荻浦

籬披寒露下蕭索微風觸摧折有餘青從橫未須束

蓼嶼

風高蓮欲衰霜重蓼初發會使此池中秋芳未嘗歇

望雲樓

雲生如涌泉雲散如翻水百變一凭欄悠悠定誰使

天漢臺

臺高天漢近匹練掛林端秋深霜露重誰見落西山

待月臺

夜色何蒼蒼月明久未上不上倚城臺無柰東南嶂

二樂榭

動靜惟所遇仁智亦偶然誰見二物外猶有天地全

灑泉亭

泉來草木滋泉去池塘滿委曲到庭除清冷備晨盥

吏隱亭

隱居亦非難欲少求易遂有意未成歸聊就茅簷試

霜筠亭

林高日氣薄竹色淨如水寂歷斷人聲時有鳴禽起
無言亭

露香亭

處世欲無言事至或未可唯有此亭空燕坐聊從我
重露覆千花繁香凝畦圃不忍日將晞散逐微風去

涵虛亭

虛亭面疎篁窈窕衆景聚更與坐中人行尋望來處

溪光亭

溪亭新雨餘秋色明滉漾鳥渡夕陽中魚行白石上

過溪亭

溪淺復通橋過者猶恨懶賴有沙上鷗常爲獨遊伴

披錦亭

春晚百花齊絲絲巧如織細雨洗還明輕風卷無迹

禊亭

觴流無定處客醉醒還酌毋令仲御歌空使人驚愕

菡萏軒

開花濁水中抱性一何絜朱檻月明時清香爲誰發

茶蘼洞

猗猗翠蔓長藹藹繁香足綺席墮殘英芳樽漬餘馥

箕筥谷

誰言使君貧已用谷量竹盈谷萬萬竿何曾一竿曲

寒蘆港

蘆深可藏人下有扁舟泊正似洞庭風日莫孤帆落

野人廬

野人三四家桑麻足生意試與叩柴荆言辭應有味

此君庵

風梢遠簷匝霜幹當窻淨遙知素壁上醉墨森相映

與可墨竹冠絕今世

金橙逕

葉如石楠堅實比霜栢大穿逕得新苞今公憶鱸膾

南園

官是勸農官種桑亦其所安得陌上人隔葉攀條語

北園

使君羨且仁遍地種桃李豈獨放春花行看食秋子

次韻吳興李行中秀才見寄并求醉眠亭詩二

首

才堪簿領更無餘贏得十年閑讀書寵辱何須身自

試窮愁不待酒驅除故人歸去無消息佳句新來屢

卷舒前日使君今在此不妨時復置雙魚

李公擇自吳興移齊南

右和見寄

是非一醉了無餘，唯有胷中萬卷書。已把人生比蘧傳，更將江浦作階除。欲眠賓客從教去，倒臥氍毹豈暇舒。京洛舊遊真夢裏，秋風無復憶鱸魚。

右醉眠亭

和子瞻玉盤盂二首

東武蘇苔公家園中千葉白芍藥子瞻新爲此名

千葉團團一尺餘，楊州絕品舊應無。賞傳莒國遷鍾虞，移憶胡僧置鉢盂。叢底留連傾鑿落，餅中捧擁照浮屠。強將絳蠟封紅萼，憔悴無言損玉膚。

故相林亭父老知，出羣草木尚何疑。無多產業殘花藥，幾許功名舊鼎彝。曩豐艷不知人世別，佳名新換使君詩。明年會看花尤好，剝盡浮苞養一枝。

寄題密州新作快哉亭二首

車騎崩騰送客來，奔河斷岸首頻回。鑿成戶牖功無幾，放出江湖眼一開。景物爲公爭自致，登臨約我共追陪。自矜新作超然賦，更擬蘭臺誦快哉。

檻前滌水去，云云洲渚蒼茫煙柳勻。萬里忽驚非故國，一樽聊復對行人。謝安未厭頻攜妓，汲黯猶須臥理民。試問沙囊無處所，于今信怯定非真。

贈馬正卿秀才

男兒生可憐赤手空腹無一錢死喪三世委平地骨肉不得歸黃泉徒行乞丐買墳墓冠幘破敗衣履穿矯然未肯妄求取耻以不義藏其先辛勤直使行路泣六親不信相尤愆問人何罪窮至此人不敢尤其怨天孝慈未省鬼神惡兄弟寧有木石頑善人自古有不遇力行不廢良謂賢

答文與可以六言詩相示因道濟南事作十首
遠遊既爲東魯遷居又愛南山齒髮自知將老心懷且欲偷安

舜井溢流陌上歷山近在城頭羈旅三年忘去故園

何日歸休

野步西湖綠縹晴登北渚煙絲蒲蓮自可供腹魚蟹何嘗要錢

飲酒方橋夜月釣魚畫舫秋風舟舟荷香不斷悠悠水固無窮

雨過山光欲溜寒來水氣如烝勝處何須吳越隨方亦有遊朋

揚雄執戟雖久陶令歸田未能眼看雲山無奈神傷簿領相仍

終歲常親鞭朴此生知負詩書欲尋舊學無處時有

故人起予

故人遠在江漢萬里時寄聲音聞道禪心寂寞未廢

詩人苦吟

佳句近參風雅微詞間發離騷竊欲比君庾信莫年

詩賦尤高

相思欲見無路滿秩西歸有時及君鈴閣少事飲我

松醪滿卮

次韻李公擇寄子瞻

青蒲一下復東來擁扇西風滿回埃擊柝自營何擇

地舖糟同醉未須回孤高振鷲瞻初下淡泊嬰兒及

未孩我亦漂流家萬里年來羞上望鄉臺

次韻李公擇以惠泉答章子厚新茶二首

無錫銅瓶手自持新芽顧渚近相思故人贈答無千

里好事安排巧一時蟹眼前煎成聲未老兔毛傾看色

尤宜槍旗攜到齊西境更試城南金線竒

金線泉在齊州城南

新詩態度靄春雲肯把篇章妄與人性似好茶常自

養交如泉水久彌親睡濃正想羅聲發食飽尤便粥

面勻底處翰林長外補明年誰送雪溪春

和李公擇赴歷下道中雜詠十二首

泛清河

南北無多水崎嶇未捨船何時好霖雨是處有通川
墳壠看書卷興亡指道邊蒼茫半秋草猶復較愚賢
將至桃園阻淺且風不得進

卷帆倚棹淺河津憶泛長江步步新未免生涯寄風
浪不堪舟楫委埃塵往來欲就沙囊堰深淺時看舉
策頻一望雲霓百憂集應思平地隱居人

桃園阻淺將易小舟一夜水大至復乘便風
頃刻百里

此生與物妄相仇欲往長嫌苦見留淺瀨何知向人
惡漲溪豈復爲公流雨痕忽到工催客風信初來轉

打頭舉目汀洲都未改忽添清興滿行舟

下邳黃石公廟

圯下相逢南北人三邀不勸識天真十年却見穀城
下寂寞同收一夢身

宿遷項羽廟

尺箠西來壘畝中驅馳力盡衆兵衝舊封獨守君臣
義故國長修俎豆容平日軍聲同破竹少年心事喜
摧鋒錦衣眷戀多鄉思肯顧田家社酒釀

呂梁

出沒懸流雖有道憑陵險地本無心未能與物都無

礙咫尺清泉亦自深

梁山泊 次韻

近通沂泗麻鹽熟遠控江淮粳稻秋粗免塵泥汗車
脚莫嫌菱蔓繞船頭謀夫欲就桑田變客意終便畫
舫遊愁思錦江千萬里漁簑空向夢中求

時議者將乾此泊以

種菽

梁山泊見荷花憶吳興五絕 次韻

南國家家漾綠艫芙蓉遠近日微明梁山泊裏逢花
發忽憶吳興十里行

終日舟行花尚多清香無柰着人何更須月出波光

淨臥聽漁家蕩槳歌

行到平湖意自寬繁花仍得就船看回頭却向吳儂
說從此遠遊心未闌

花開南北一般紅路過江淮萬里通飛蓋靚粧迎客
笑鮮魚白酒醉船中

菰蒲出沒風波際鴈鴨飛鳴霧雨中應爲高人愛吳
越故於齊魯作南風

次韻李公擇九日見約以疾不赴

它年逢九日杯酒逐英豪漸老經秋病獨醒何處高
床頭添藥裏坐上減牛毛寂寞知誰問煩公置濁醪

喜雪呈李公擇

秋來早已久雪至亦不薄沉沉夜未眠
蔌蔌聲初落霏微入疎戶眩晃先朱閣
披衣視羣動照屋始驚愕晨起犯清寒
繁陰看漠漠喬林凍相倚隙瓦乾猶爍
孤村掩圭竇深逕沒芒屨平野恣汗漫
四山增犖嶱晚色漏斜陽林光粲相錯
氛埃一清蕩疫癘解纏縛寒蔬養春芽
宿麥布冬脚官居亦何賴歲事信所託
逋逃幸一飽剽盜止羣惡無事樂自多有酒庶可酌
我行今不久公到時方昨豐穰識天意
暇豫可前約齋廚雖無餘賓客甚易諾
行須酒壺倒莫待陰雲剝

次韻范郎中仰之詠雪

倉廩未應空長天霰雪濛瓊瑤布地淨
組練出師雄雲闊諸峰遍花繁百草同
農謠麥壠外客興酒杯中聚散占風力
消融驗藥功歷城西北陽起石遠遊聊
自喜二見歲時豐

次韻李公朝著作見贈二首

遠客徒爲爾江邊有故丘汀洲信廣大
鳧鴈任漂浮好事時攜酒歸心久倦遊
還鄉定衰老朋友肯相收

其二

稽古終何力扶衰謾有方故人憐困躓
佳句贈輝光

未暇抽身去安能插翅翔空存踈懶性高臥笑羲皇
惠穆呂公挽詞二首

全齊開故國清廟饗元功德業真無忝勲名但未克
邊防推信惠社稷倚勤忠不作司徒貴何慙鄭武公

其二

風俗非平昔賢豪棄此時新阡長宿草行路拜豐碑
惠術遐方記嘉猷信史知悲涼哭墳客不爲受恩私

次韻蔣夔寒夜見過

都城廣大漫如天旅人騷屑誰與歡北風號怒屋無
瓦夜氣凝冽冰生槃雪聲旋下白玉片燈花暗結丹

砂丸叩門剝啄驚客至吹火倉卒憐君寒明時未省
有遺棄高論自笑終汗漫識君大學嗟歲久至今客
舍猶泥蟠正如憔悴入籠鶴坐見摧落凌風翰明朝
尚肯過吾飲有酒不盡行將酸

次韻王鞏廷評招飲

病憶故鄉同越鳥性安田野似禪謀都城歲晚不歸
去客舍夜寒猶獨吟樽酒憐君偏好客詩篇寄我謬
知音會須雪裏相從飲履迹旋平無處尋

雪中會孫洙舍人飲王氏西堂戲成三絕

新歲逼人無一日殘冬飛雪已三迴百分琥珀從君

勸十里瓊瑤走馬來

南國高人真巨源華堂邂逅接清樽十年一見都如
夢莫恠終宵語笑喧

傾盡香醪雪亦晴東齋醉臥已三更佳人不慣生疎
客不盡清歌宛轉聲

雪中呈范景仁侍郎

羈遊亦何樂幸此賢主人東齋暖且深高眠不知晨
開門驚照曜舞雪方繽紛繁雲覆庭廡落勢一何勻
霏霰本無着積疊巧相因萬類忽同色九衢淨無塵
園林開組練觀闕堆瓊珉蟲書散鳥足編帶翻車輪

遠遊浩千里欲出迷四隣誰言助春農亦善欺客貧
賴我古君子高談吐陽春方當庇華屋豈憂無束薪

次韻景仁丙辰除夜

數舉除夜酒稍消少年豪浮光寄流水妙理付濁醪
微陽未出土大雪飛鵝毛試問冰霜勁春來能久牢
次韻景仁招宋溫之職方小飲

高人兩無事相見輒傾懷時以酒相命何妨心自齋
燈期飛雪亂春候苦寒乖不就頽然醉難堪風且霾
次韻景仁飲宋溫之南軒二首

白髮迎新歲皤然國老更感時能細說對酒任徐行

畫軸高分品詩詞妙入評疎狂先醉倒應許恃鄉情
其二

飲闌餅已罄話久僕須更高會良難得危言豈易行
歸休便老計得失任臺評猶有青編在它年不世情

次韻景仁正月十二日訪吳鎮寺丞二絕

夜雪滿庭雞失晨瓊田早出不驚塵急須卷凍鋪黃
道欲看燈山萬萬人

濁醪時飲十分杯萬象溟濛曉氣皚醉倒籃輿夜歸
去金吾寧復識誰哉

柳子玉郎中挽詞二首

晚歲抽身塵土中瀟山仍乞古仙宮羞將白髮隨
叟欲就丹砂繼葛洪龍虎未能留物化芭蕉久已悟
身空騷人欲作招魂賦蟬蛻疑非世俗同

新詩錦繡爛成編醉墨龍蛇灑未乾共首卜居空舊
約宛丘攜手憶餘歡風流可見身如在鄉國全歸意
所安行到都門送君處長河清淚兩洄瀾

贈淨因臻長老

十方老僧十年舊燕坐繩床看奔走遠遊新自濟南
來滿身自覺多塵垢煖湯百斛勸我浴驪山衮衮泉
傾竇明窓困臥百緣絕此身瑩淨初何有清泉自清

身自縈塵垢無生亦無滅振衣却起就華堂老僧相
對無言說南山采茵軟未乾西園擷菜寒方茁與君
飽食更何求一杯茗粥傾銅葉

次前韻答景仁

儒林談道亦云舊遠自太史牛馬走區區分別竟何
爲擾擾祗添心上垢道大如天不可測異出同歸各
穿竇浩然一水散千漚却觀彼我曾無有我丈中心
冰玉絜世上浮榮盡灰滅終年行道自不知笑指空
門名異說此心未信道不生石上下種何由茁道在
起居飲食中安問胡僧分五葉

遊城西集慶園

送客城西客已遠歸路北池接南苑冰漸片斷水光
浮柳線和柔風力軟繚牆朱戶誰家園流水平畦春
日淺禁河分溜一池足洛圃移花百金賤飛甍斤斧
聲未絕翠栢栽培影初遍傍人笑指高臺處前年適
見荒榛滿金錢力奪天地功歲月未多風物換人生
富貴無不成都門坐置山林觀暖風遲日時一到早
出莫歸應未晚主人最貴稀出城長使憧憧路人看

遊景仁東園

新春南驚蟄草木猶未知高人靜無事頗恠春來遲

肩輿出東郊輕裘試朝曦百草抱生意喬松解寒姿
尺書招友生冠蓋溢通達人生瞬息間幸此休暇時
濁酒淪浮蟻嘉蔬薦柔荑春來莫嫌早春去恐莫追
公卿多王事田野遂我私松筠自擁蔽里巷得遊嬉
隣家竝侯伯朱門掩芳菲畦花被錦繡庭檜森旌旗
華堂絢金碧疊觀凝煙霏髣髴象宮禁蕭條遠喧卑
徐行日一至何異已有之都城閉門早衆客紛將歸
垂楊返照下歸騎紅塵飛但下永日歡未與清夜期
人散衆囂絕庭光星斗垂安眠萬物外高世良在茲

樂城集卷之六

終

樂城集卷之七

宋 西蜀蘇轍子由 著

明 東吳王執禮子敬 校

詩五十六首

次韻子瞻送范景仁遊嵩洛

尋山非事役行路不應難洛浦花初滿嵩高雪尚寒
平林抽凍筍竒艷變山丹節物朝朝好肩輿步步安
醪醖釀臘酒苜蓿薦朝盤得意忘春晚逢人語夜闌
歸休三黜柳賦詠五噫鸞鶴老身仍健鴻飛世共看
雲移忽千里世路脫重灘西望應思蜀東還定過韓

平川涉清潁絕頂上封壇出處看公意令人欲棄官
送蔣夔赴代州教授

憶遊太學十年初猶見胡公豈第餘遍閱諸生非有
道最憐能賦似相如青衫共笑方持板白髮相看各
滿梳暫免百憂趨長吏勉調三寸事新書

次韻宿州教授劉涇見贈

此身雖復類潛夫衰老無心強著書道路不知奔走
賤交遊空恠往還踈弦歌更就三年學簿領唯添一
味愚它日相逢定何處莫將文采笑空疎

徐州送江少卿

夜雨泗河深曉日輕舟發帆開送客遠城轉高臺沒
居人永瞻望歸意何倉卒公來初無事豐歲多年麥
鈴閣渡清風芳罇對佳客登臨未云厭談笑方自適
朝廷念鰥老府寺虛清劇何以寄風流江山遶官宅
次韻子瞻寄眉守黎希聲

眼看狂瀾倒百川孤根漂蕩水無邊思家松菊荒三
逕回首謳歌沸二天簿領沉迷催我老春秋廢格累
公賢隣居屈指今誰在一念傷心十五年

轍昔侍先人於京師

與希聲隣居太學前是時公之二兄與二兄姊皆
在今十五年而在者唯公與僕二人言之流涕

和李邦直學士沂山祈雨有應

宿雪雖盈尺不救春夏旱吁嗟遍野天不聞歌舞通
宵龍一戰旋開雲霧布旌旗復遣雷霆助舒卷雨聲
一夜洗塵埃流入溝河朝不見但見青青黍與禾老
農起舞行人歌汗邪蒲車尚可許供輸到骨期無它
水行天地有常數歲歲出入均無頗半年分已厭枯
槁及秋更恐憂滂沱誰能且共蛟龍語時布甘澤無
庸多

陪子瞻遊百步洪

城東泗水平如席城頭遠山涵落日輕舟鳴橈自生
風渺渺江湖動顏色中洲過盡石縱橫南去清波頭
盡白岸邊恠石如牛馬銜尾舳艫誰敢下没人出沒
須臾間却立沙頭手足乾客舟一葉久未上吳牛回
首良間關風波蕩瀟未可觸歸來何事嘗艱難樓中
吹角莫煙起出城騎火催君還

李邦直見邀終日對臥南城亭上二首

一徑坡陁草木間孤亭勝絕俯川原青天圖畫四山
合白晝雷霆百步喧煙柳蕭條漁市遠汀洲蒼莽白
鷗翻客舟何事來忽草逆上波濤吐復吞

東來無事得遨遊奉使清閑亦自由撥棄簿書成一
飽留連語笑失千憂舊書半卷都如夢清簟橫眠似

欲秋聞說歸朝今不久塵埃還有此亭不

次韻邦直見答二首

真能一醉逃煩暑定勝三杯禦臘寒自有詩書供永
日莫將絲竹亂風灘舞雩何處歸春莫叩角誰人怨
夜漫聞道丹砂近有術錙銖稱火共君看

五斗塵勞尚足留閉門聊欲治幽憂羞爲毛遂囊中
穎未許朱雲地下遊無事會須成好飲思歸時亦賦
登樓羨君幕府如僧舍日向城隅看浴鷗

再次前韻四首

城頭棟宇恰三間楚望淒涼弔屈原雨洗山川百里

淨風吹語笑一城喧鄉書莫問經時絕歲事初驚片
葉翻南近清淮鱸鱖好釣筒時聞有潛吞

謬將疎野託交遊平日論心亦有由科第聯翩叨舊
契利名疎闊少新憂清談已覺忘朱夏濁酒先防虐
素秋多病無聊唯有睡頻頻詩句未嫌不

野鶴應疑見鴈苦夏蟲未慣雪霜寒隱居顏氏終安
巷垂釣巖生自有灘破宅不歸塵可掃下田初種水
應漫退耕尚作悠悠語拙宦猶須步步看

欲作彭城數月留溪山勸我暫忘憂城頭準擬中秋
望臺上遷延九日遊嵐氣雨餘侵近郭江聲風送隱

危樓汀洲聚散知誰恠且學漂浮水上鷗

雨中陪子瞻同顏復長官送梁燾學士舟行歸

汶上

客從南方來信宿北方去手棹木蘭舟不顧長江雨
江昏氣陰黑雨落無朝暮蕭蕭赴波濤濛濛暗洲渚
微涼入窻闔斜吹濕蕉苧漂灑正紛紜談笑方容與
不知江路長但覺青山驚客去浩難追落日平西浦
東遊本無事愛此山河古周旋樽俎歡邂逅英豪聚
茲遊有遺趣此樂恐宜屢賤仕迫程期遷延防譴怒
秋風日已至輕舸行當具陰森古城曲蒼莽交流處

懸知別時念將行重回顧非緣一寸祿應作三年住

同子瞻泛汴泗得漁酒二詠

江湖性終在平地難久居淶水雨新漲扁舟意自如
河身縈疋素洪口轉千車願言棄城市長竿夜獨漁
其二

懶思久廢詩病腸不堪酒強顏水石間濫蹟賓主後
不知白浪翻但恠青山走莫隨使車塵豈畏嚴城斗

明日復賦

放舟城西南却向東南泊朝來雨新霽白水浸城脚
古汴多流莖清泗亦浮沫平吞百澗暴滅盡三洪惡

遊人不勝喜水族知當樂舟行野鳧亂網盡脩鱗躍
香醪溜白蟻鱸縷填花萼人生適意少一醉皆應諾
同遊非偶然後會未前約簡書尚見寬行日爲公却
贈吳子野道人
食無酒肉腹亦飽室無妻妾身自好世間深重未肯
回達士清虛輒先了眼着鴻鵠薄雲漢長笑駑駘安
能卑腹中夜氣何郁郁海底朝陽常杲杲一塵不顧
舊山深萬里來看故人老空車獨載王陽橐遠遊屢
食安期棗東州相逢真邂逅南國思歸又驚矯道成
若見王方平背癢莫念麻姑爪

李邦直出巡青州余不久將赴南都比歸不及

見矣作詩贈別

東道初來託故人南樓頻上泗河漕江山尚有留人
意樽俎寧當厭客貧顧我及秋行不久問君觸熱去
何因西歸涼冷霜風後濁酒清詩誰與親

司馬君實端明獨樂園

子嗟丘中親藝麻邵平東陵親種瓜公今歸去事農
圃亦種洛陽千本花修篁遶屋韻寒玉平泉入畦紆
臥地錦屏竒種斲巖竇高高靈藥移萌芽城中三月
花事起肩輿遍入公侯家淺紅深紫相媚好重樓多

葉爭矜誇一枝盈尺不論價十千斗酒那容賒歸來
曳履苔逕滑醉倒閉門春日斜車輪班班走金轂印
綬若若趨朝衙世人不顧病楊綰弟子獨有窮疾芭
終年著書未曾厭一身獨樂誰復加宦遊嗟我久塵
土流轉海角如浮槎歸心每欲自投劾孺子漸長能
扶車過門有意奉談笑幅巾懷刺無袍鞞

送顏復赴闕

簞瓢未改安貧性鳧繹猶傳直道餘不見失官愁感
感但聞高臥起徐徐居中舊厭軍容講補外仍遭城
旦書此去將身置何許秋風未免憶鱸魚

王詵都尉寶繪堂詞

侯家玉食繡羅裳彈絲吹竹喧洞房哀歌妙舞奉清
觴白日一醉萬事忘百年將種存慨慷西取庸蜀踐
戎羌戰袍賜錦盤鸚章寶刀玉玦餘風霜天孫渡河
夜未央功臣子孫白且長朱門甲第臨康莊生長介
胄羞膏梁四方賓客坐華堂何用爲樂非笙簧錦囊
犀軸堆象牀竿叉連幅翻雲光手披橫素風飛揚長
林巨石插雕梁清江白浪吹粉牆異花沒骨朝露香

徐熙畫花落筆縱橫其子嗣變格以五色染
就不見筆迹謂之沒骨蜀趙昌蓋用此法耳 摯禽猛

獸舌齧張騰踏駉衰聯驕驕噴振風雨馳平岡前數

顧陸後吳王老成雖喪存典常坐客不識視茫洋騏
驎飛煙郁芬芳卷舒終日未用忙遊意淡泊心清涼
屬目俊麗神激昂君不見伯孫孟孫俱猖狂千時與
事神弗臧

逍遙堂會宿二首

并引

轍幼從子瞻讀書未嘗一日相舍既壯將遊宦四方
讀韋蘇州詩至安知風雨夜復此對床眠惻然感之
乃相約早退爲閑居之樂故子瞻始爲鳳翔幕府留
詩爲別曰夜雨何時聽蕭瑟其後子瞻通守餘杭復
移守膠西而轍滯留於淮陽濟南不見者七年熙寧

十年二月始復會於澶濮之間相從來徐留百餘日
時宿於逍遙堂追感前約爲二小詩記之

逍遙堂後千尋木長送中宵風雨聲誤喜對床尋舊
約不知漂泊在彭城

秋來東閣涼如水客去山公醉似泥困臥北窓呼不
起風吹松竹雨淒淒

過張天驥山人郊居

南山莫將歸下訪張夫子黍稷滿秋風蓬麻翳隣里
君年三十八三十有歸意躬耕奉慈親未覺鉏耰鄙
讀書北葱竹釀酒南園水松菊半成陰日有幽居喜

客來時借問問子何年起新求西溪石更築茆堂址
但令三歲熟此計行亦遂堂成不出門清名滿朝市

魏佛狸歌

魏佛狸飲泗水黃金甲身鐵馬箠睥睨山川俯畫地
畫作西方佛名字卷舒三軍如使指奔馳萬夫鑿山
崩雲中孤月妙無比青蓮湛然俛下視擊鉦卷旆抽
行營北徐府中軍吏喜度僧築室依雲煙俯窺城郭
衆山底興亡一瞬五百年細草荒榛沒孤壘

雜興二首

陋巷丈夫病且貧懸鶉白結聊庇身蠕蠕大蟲長孫

子敗繒弊絮開陽春故襦寬博裹肩胛出沒逡巡初
莫畏一朝換酒入隣家顧視胷間猶犢鼻入縫循腰
還自足肌膚轉近尤爲福咋皮吮血無已時應待渠
家具湯沐

朱輪華蓋事遠遊旃無良馬乘疲牛青絲玉勒金絡
頭任重道遠旁人憂奔馳往來歷山丘騰坑投淖摧
輶輶已壓復起行未休青芻黃梁爲君羞長路漫漫
經九州場有白駒胡不收饑食玉山飲河流朝秣幽
冀莫炎陬奔雲掣電不少留僕夫顧之心懷愁王良
不生誰與謀哀哉駿骨千金酬

贈致仕王景純寺丞

瀟山隱君七十四絳瞳綠髮初謝事腹中靈液變丹砂江上幽居連福地彭城爲我住三日明月滿船同一醉丹青細字口傳訣顧我沉迷真棄耳年來四十髮蒼蒼始欲求方救憔悴它年若訪瀟山居慎勿逃人改名字

初發彭城有感寄子瞻

秋晴卷流潦古汴日向乾扁舟久不解畏此行路難此行亦不遠世故方如山我持一寸刃巉絕何由刊念昔各年少松筠闕南軒閉門書史叢開口治亂根

文章風雲起胃膽渤澥寬不知身安危俛仰道所存橫流一傾潰萬類爭崩奔孔融漢儒者本自輕曹瞞誓將貧賤身一悟世俗昏豈意十年內日夜增濤瀾生民竟顛顛遊宦豈復安水深火益熱人知蹈憂患甄豐且自叛劉歆苟盤桓而况我與兄飽食顧依然上願天地仁止此禍亂源歲月一徂逝尚能反丘園

次韻子瞻見寄

袞袞河渭濁皎皎江漢清源流既自異美惡終未明嗟我頑鈍質乃與公竝生出處每自託謳吟輒嘗賡譬如病足馬共此千里程勝負坐已決豈待終一枰

憶公年少時濯濯吐新萌堅姿映松栢直節凌榛荆
學成志益厲秋霜落春榮澹然養浩氣脫屣遺齊鄉
百鍊竟不變三年終未鳴區區兩郡守籍籍四海聲
年來效瘖默世事慵譏評不見室家好恍如揖重城
別離長塵垢歲月何崢嶸彭門偶會合白髮互相驚
受教恐不足吐論那復爭疾雷發聾聵清月照昏育
篤愛未忍棄浪云舊齊名更請問郭許題品要當精

子瞻杭州見寄詩云
先生別駕舊齊名

將至南京雨中寄王鞏

河牽一線流不斷雨散千絲卷却來煙際橫橋村十

里船中倦客酒三杯老年轉覺脾嫌濕世路早令心
似灰賴有故人憐寂寞繫舟待我久徘徊

次韻王鞏見贈

南都逢故人共此一樽渌初來柳吹絮再見風脫木
我老歡意微頭垂腰背曲羨子方少年健馬走平陸
狂歌手自拊醉倒頭相觸人生比一瞬世網張萬目
但取食場雞豈掛雲飛鵠彭城久相遲官舍虛東屋
重陽試新釀謂子當不速胡為聽婦言婉孌自相逐
我舟得愁霖牽挽脫坑谷風霜作初寒病體欲生粟
解子腰下龜換酒不須贖照碧凝清光相將飲萸菊

送交代劉莘老

建元一二間多士四方至翩翩下鴻鵠一一抱經緯
功名更唯諾爵祿相饋遺縱橫聖賢業磊落君臣意
慷慨魯諸生雍容古君子扶搖雲漢上睥睨千萬里
入臺霜凜然不肯下詞氣失足青冥中投命江湖裏
區區留都客矯矯當世士空使往來人歎息更相指
我生本羈孤無食強爲吏褰裳避塗泥十載守顛顛
逝將老茅屋何幸繼前軌念君今尚然顧我真當爾
百年同一夢窮達浪憂喜有酒慰離愁貧賤非君耻

次韻王鞏九日同送劉莘老

頭上黃花記別時樽中渌酒慰清悲畫船牽挽故不
發紅粉留連未遽離小雨無端添別淚遙山有意助
顰眉十分酒盞從教勸堆案文書自此辭

次韻王鞏欲往徐州見子瞻以事不成行

河水南來遶郡城銀刀空復銜銜兵交情舊許雞爲
具客信那知鶻妄鳴爲婦遲留應未怪還家倉卒定
何營不關秦女箏聲怨自趨招賢浚上旌

宣徽使張安道生日

從公淮陽今幾年憶持壽筆當公前祝公齒髮老復
少歲歲不改冰霜顏掃除四海一清淨整頓萬物俱

安全今年見公商丘側奉祠太一真仙官身安氣定
色如玉脫遺世俗心浩然幽居屢過赤松子長夜親
種丹砂田此中自有不變地歲閱生日如等閑門前
賀客任填委世上多故須陶甄秋風坐見蒲柳盡歲
晏惟有松柏堅斯人未安公未用使公難老應由天

章氏郡君挽詞

子厚母

馮唐垂老郎潛後李白風流罷直餘解組同歸榮故
國剖符仍得奉安輿家聲未替三公舊墓客應傾數
郡車德映閨門人莫見埋文子細列幽墟

聞王鞏還京會客劇飲戲贈

聞君歸去便招呼笑語不知清夜徂結束佳人試銀
甲留連狂客惱金吾燭花零落玉山倒詩筆欹斜翠
袖扶暫醉何年依錦瑟東齋還復臥氍毹

次韻王鞏遊北禪

蕭蕭黃葉下城頭頓作野田風日秋粗有樽壘隨處
好斲無敲朴便能幽人稀野鳥應同樂水涸遊魚似
欲愁客去知君歡未已遶城攜手更遲留

次韻王鞏懷劉莘老

兩都來往太頻頻真是人間自在人十載讀書同白
屋千金爲客買朱唇結交京邑傾心肺寓思禪宗離

垢塵爲問西歸天祿客何時同看洛川神

飲餞王鞏

送君不辦沽斗酒撥醅浮蟻知君有問君取酒持勸
君未知客主定何人府中杯棬強我富案上首霜知
吾真空廚赤脚不敢出大堤花艷聊相親愛君年少
心樂易到處逢人便成醉醉書大軸作歌詩頃刻揮
毫千萬字老夫識君年最深年來多病苦侵凌賦詩
飲酒皆非敵危坐看君浮太白

送王鞏兼簡都尉王詵

可憐杜老貧無食杖藜曉入春泥濕諸家厭客頗惱
人徃徃閉門不得入我今貧與此老同交遊冷落誰
相容幸君在此足遊衍終日騎馬西復東送君仍令
君置酒如此貧交世安有君歸速語王武子因君回
船置十斗

呂希道少卿松局圖

溪回山石間蒼松立四五水深不可涉上有橫橋渡
溪外無居人磐石平可住縱橫遠山出隱見雲日莫
下有四老人對局不回顧石泉雜風松入耳如暴雨
不聞人世喧自得山中趣何人昔相遇圖畫入統素
塵埃依古壁永日奉樽俎隱居畏人知好事竟相誤

我來再三嘆空有飛鴻慕逝將從之遊不惜爛樵斧

寄孔武仲

濟南舊遊中好學惟君耳君居向南麓洶湧岡巒起
我來輒解帶簷下炙背睡煎茶食梨栗看君誦書史
君歸苦倉卒窻戶日摧毀遷居就清曠改築富前址
開畦得遺植遶壁見題字雲山顧依然簿領輒隨至
思君猶未忘滿秩行自棄爾來鉅野溢流潦壓城壘
池塘漫不知亭榭日傾弛官吏困堤障麻鞋汙泥滓
別來能幾何陵谷既遷徙它日重相逢衰顏應不記

孔君亮郎中新葺闕里西園棄官而歸

宦情牢落苦思歸君側無人留子思手種松筠須灌
漑親修寢廟憶丞祠定應此去添桃李還似舊塋無
棘茨他日東遊訪遺烈因公導我謁先師

寄濟南守李公擇

岱陰皆平田濟南附山麓山窮水泉見發越遍溪谷
分流遶塗巷暖氣蒸草木下田滿粳稻秋成比禾菽
池塘浸餘潤菱芡亦云足辭家四千里恃此慰窮骨
公從吳興來茗雪猶在目應恐齊魯間長被塵土辱
不知西垣下滉漾千畝淥仰見鷗鷺翻俯視龜魚浴
初來厭桴鼓稍久捐鞭朴清詩調嘉賓夜話繼華燭

飛花暮雪深浮蟻糟床熟相對各忘歸西來自嫌速
人生每多故樂事難再卜鉅野一汗漫河濟相騰蹙
流沙翳桑土蛟蜃處人屋農畝分沉埋城門遭板築
傷心念漂蕩引手救顛覆勞苦空自知吁嗟欲誰告
遙知舊遊處落落空遺躅平生讀書史物理粗能矚
歸耕久不遂終作羝羊觸賦詩心自驚請公再三讀
雪中會飲李倅釣東軒三絕

衆客喧譁發酒狂逡巡密雪自飛揚莫嫌作賦無枚
叟且喜延賓有孝王

雪花如掌墮堦除劇飲時看卧酒壺半夜瓊瑤深沒
滕欲歸迷路肯留無

竹裏茅庵雪覆簷爐香藹藹著蒲簾欲求初祖安心
法笑我醺然已半酣

張恕寺丞益齋

人生不讀書空洞一無有羨君常齋居散帙滿前後
開編試尋繹閱歲行自富從橫畫圖出次第宮商奏
汪洋畜江河眇莽包林藪興亡數千歲絡繹皆在口
顧念今所知頗覺前日陋我家亦多書早歲嘗竊叩
晨耕掛牛角夜燭借鄰牖經年謝賓客飢坐失昏晝
堆甍稍蟠屈落筆逢左右樂如聽鈞天醉劇飲醇酎

自從厭蓬華誤逐功名誘初心一漂蕩舊學皆榛莠
失足難還回撫卷長自詬幸君無事年謂可終身守
春耕不厭深秋穫富自受金玉或為災詩書豈相負

除夜會飲南湖懷王鞏

歲晚城東故相家夜聽簾外落瓊花醉眠東閣銀缸
暗起視中庭風竹斜魯酒近來無柰薄秦箏別後苦
聞誇思君勸對空陂飲歸去紛如日莫鴟

次韻張恕戲王鞏

去歲此日大雪僕醉定國東齋

二君豪俊並侯家歌舞爭妍不受誇聞道肌膚如素
練更堪鬢髮似飛鴟

送轉運判官李公恕還朝

我行未厭山東遠昔遊歷下今梁苑官如雞肋浪奔
馳政似牛毛常黽勉幸公四年持使節按行千里長
相見鷹掣秋田伏兔驚驥馳平野疲牛勸似憐多病
與時違未恠兩州從事懶除書奪去一何速歸袖翩
然不容挽黃河東注竭崑崙鉅野橫流入州縣民事
蕭條委濁流扁舟出入隨奔電回首應懷微禹憂歸
朝且喜寧親便公知齊楚即為魚勸築宣防不宜緩

樂城集卷之八

宋西蜀蘇轍子由著

明東吳

王執禮子敬

全校

顧天叙禮初

詩六十八首

寄范丈景仁

京城冠蓋如雲屯日中奔走爭市門弊裘瘦馬不知
 路獨向城西尋隱君隱君白髮養浩氣高論驚世門
 無賓欣然爲我解東閣明窓淨几舒華茵春天雪花
 大如手九衢斷絕愁四隣平明熟睡呼不覺清詩淥
 酒時相親我兄東來自東武走馬出見黃河濱及門

却遣不得入回顧欲去行無人東園桃李正欲發開
門借與停車輪青天露坐列觴豆落花飛絮絮飄衣巾
留連四月聽鷓鴣扁舟一去浮奔渾人生聚散未可
料世路險惡終勞神交遊畏避恐坐累言詞欲吐聊
復吞安得如公百無忌百間廣厦安貧身

次韻王鞏上元見寄三首

棄擲良宵君謂何清天流月鑑初磨莫辭病眼羞紅
燭且試春衫剪薄羅蓮艷參差明繡戶舞腰輕瘦颭
驚鼉少年微服天街闊何處相逢解佩珂

繁燈厭倦作閑遊行到僧居院院留月影隨人深有

意車音爭陌去如流酒消鑿落寧論斗魚照琉璃定
幾頭過眼繁華真一夢終宵寂寞未應愁

燈火熏天處處同暗遊應避栢臺驄高情自放喧闐
外勝事偏多淡泊中平日交遊徒夢想留都歌吹憶
年豐知君未有南來意歸去相從光與鴻

謝張安道惠馬

從事年來鬢似蓬破車倦僕衆人中作詩僅比窮張
籍得馬還從老晉公夜起趨朝非所事曉騎行樂定
誰同慣乘款段遊田里怯聽駸駸兩耳風

張水部集有謝裴晉

公惠馬詩

次韻子瞻贈梁交左藏

彭城欲往臺無檄初喜東西合爲一將軍走馬隨春
風精銳千人森尺籍口占佳句驚衆坐手練強兵試
鳴鏑酒酣起舞花滿地醉倒不聽人扶出歸來相對
如夢寐虎踞熊經苦岑寂黃樓方就可同遊飲盡官
厨三百石

寒食遊南湖二首

春睡午方覺隔牆聞樂聲肩輿試扶病畫舫聽徐行
適性逢樽酒開懷挹友生遊人定相笑白髮近從橫

其二

遶郭春水滿被堤新柳黃官池無禁約野艇得飛揚
浪泛歌聲遠花浮酒氣香晚風歸棹急細雨濕紅粧

其三

攜手臨池路時逢賣酒壚柳斜低繫纜草綠薦傾壺
波蕩春心起風吹酒力無冠裳強包裹半醉遣誰扶

觀大閱

承平郡國減兵屯唯有留都一萬人票姚將軍思出
塞從橫幕府諱和親旌旗不動風將轉部曲無聲馬
亦馴八陣且留遺法在未須親試革車塵

送林子中安厚卿二學士奉使高麗二首

東夷從古墓中華萬里梯航今一家夜靜雙星先渡
海風高八月自還槎魚龍定亦知忠信象譯何勞較
齒牙屈指歸來應自笑手持玉帛賜天涯
官是蓬萊海上仙此行聊復看桑田鯤移鵬徙秋帆
健潮闊天低曉日鮮平地誰言無嶮阻仁人何處不
安全但將美酒盈船去多作新詩異域傳

送趙屺祕書還錢塘

世人何局促奔走鬢蒼蒼聞道餘杭守獨遊何有鄉
禪心朝吐月元氣夜生光清靜安罷瘵寬仁服暴強
聲名高一世風采見諸郎謁帝朱爲綬還家綵作裳

經過留畫舫談笑接清觴問訊顏依舊崢嶸歲自長
人生真幾許世味不堪嘗歸去聞詩罷求余却老方
馬上見賣芍藥戲贈張厚之二絕

春風欲盡無尋處盡向南園芍藥中過盡此花真盡
也此生應與此花同
春來便有南園約過盡春風約尚賒綠葉成陰花結
子便須攜客到君家

答見和

花柳蕭條行已老聖賢希闊未嘗中眼看芍藥紛紛
盡賴有櫻桃顆顆同

塵編何用朝朝看新釀還須處處賒好事若能頻載
酒不妨時復到楊家

送呂希道少卿知滁州

長恠名卿亦坐曹忽乘五馬列旌旄才多莫厭官無
事郡小不妨名自高庶子定應牽賦詠醉翁聊復繼
遊遨試尋苦戰清流下要識經綸帝業勞

次韻張恕春莫

祇言城市無佳處亦有南湖幾度遊好雨晴時三月
盡啼鶯到後百花休老猿好飲常連臂野馬依人自
絡頭不肯低回池上醉試看生滅水中漚

次韻傅宏推官義方亭

居近古城心自幽簞瓢足用更何求鶯飛旋趁春風
出龍臥終聞莫雨搜科第聯翩收甲乙鄉閭驚恠問
因由隱君淡泊無人識長夏一衫冬一裘

送梁交之徐州

湖水清且深新荷半猶卷未見紅粧窈窕娘先排翠
羽參差扇水面風生人未知歆傾俯仰長先見岸上
遊人莫不歸清香入袖涼吹面投壺擊鞠綠楊陰共
盡清樽食白飯坐中飛將忽先起輕衫出試彭門遠
百步洪西白浪翻戲馬臺南雲岫滿江山雄麗信宜

人風流孰似梁王苑

次韻王鞏見寄

日永官閑自在慵
門前客到未曾通
憐君避世都門裏
勸我忘憂酒盞中
城下柳陰新過雨
湖邊荷葉自翻風
早須命駕追清賞
大字新詩事事工

次韻李達見贈

太學羣遊經最明
青衫顛顛竟何成
齏鹽仍作當年味
名譽飛蠅過耳聲

次韻秦觀秀才携李公擇書相訪

濟南三歲吾何求
史君後到消人憂
君言有客輕公

侯扁舟相從古揚州
致之匹馬恨無力
千里相望同異域
誦詩空使四坐驚
隱居未易凡人測
史君南歸無限情
鴻飛携書墮我庭
此書兼置昔年客
袖中秀句淮山青
老夫強顏依府縣
堆案文書本非願
清談亶亶解人頤
安得坐右長相見
狂客吾非賀季真
醉吟君似謫仙人
未契長遭少年笑
白髮應慙傾蓋新
都城酒貴誰當換
塵埃汗面非良筭
歸來泗上苦思君
莫待黃花秋爛漫

秦君與家兄子瞻約秋後再遊彭城

送龔鼎臣諫議移守青州二首

稷下諸公今幾人
二三爲祭酒
髮如銀
梁王官殿歸留

樂城集 卷之八 三百八十五
鑰尚父山河屬老臣沂水弦歌重會點菑川故舊識
平津過家定有金錢費千里爭者衣錦身

面山負海古諸侯信美東方第一州勝勢未容秦地
嶮竒花僅比雒城優新絲出盎冬裘具貢棗登場歲
事休鈴閣虛閑官釀熟應容將佐得遨遊

送余京同年兄通判嵐州

矯矯吳越士遠爲并代行寒暄雖云異慷慨慰平生
我昔在濟南君時事淄青連年食芋炙便欲忘尊羹
問君棄鄉國何似弊屣輕丈夫事所志歸去無田耕
閑官少愧耻教子終餘齡定心養浩氣閉目收元精

此志我亦然偶與長者并會合不可期未易夸者評

次韻王鞏見寄

觸事如碁一一低昏然一睡更何知賈生流落南遷
後陶令衰遲歸去時去住由人真水母簞瓢粗足亦
山雌年來未省談堯舜一呖麓踈豈足吹

河上莫歸過南湖二絕

西來白水滿南池走馬池邊日落時橋底荷花無限
思清香乞與路人知

淤田水淺客來遲解舫都門問幾時誰道兩京雞犬
接差除屈指未曾知

送提刑孫頌少卿移湖北轉運

持節憂邦刑職業已自簡下車攝留都談笑事亦辦
開軒揖佳客退食事書卷爲政曾幾何清風自無限
官居歲月迫歸念湖湘遠依依東軒竹凜凜故人面
詔書遂公私使節許新換舊治行當經家山企可見
宦遊得鄉國勞苦顧猶願歸旆正滂洋行輶豈容緩

次韻劉涇見寄

天之蒼蒼亦何有亦有雲漢爲之章人生混沌一氣
耳嘿嘿何用知肺腸孔公孟子巧言語剖瓢插竹吹
笙簧含宮吐角千萬變坐令隱伏皆形相我生稟賦

本微薄氤氳方寸不自藏譬如蘭根在黃土春風驅
迫生繁香口占手寫豈得已此亦未免物所將方將
寂寞自收歛不受世俗斗尺量旣知仍作未能止紛
紜竟亦類彼莊煎烹心脾擢胃腎自令鬢髮驚秋霜
嗟子獨未知此病從橫自恃莆瓜剛少年一見非俗
物鏘然修竹鳴孤凰近來直欲扛九鼎令我畏見筆
力强提攜童子從冠者揣摩五帝論三皇詩書近日
貴新說掃除舊學漫無光竊攘瞿曇剽李耳牽挽性
命推陰陽狂流袞袞去不返長夜漫漫未遽央詞鋒
俊發魯連子慚愧田巴稱老蒼是非得失子自了一

醉早醒余所望

城南訪張恕

事似棼絲撥不開秋隨脫葉暗相催城南綠野宜幽
步水北紅塵漫作堆赤棗青瓜報豐熟黃雞白酒勸
徘徊此中真有醇風在一畝何年斲草萊

同李倅鈞訪趙嗣恭留飲南園晚衙先歸

城南高樓出喬木下有方塘秋水足新霜未變草木
鮮晚日旋催梨棗熟雨荒松菊半榛莽風老菰蒲初
瑟縮門前大路多塵土日中過客無留轂開門却掃
如有待下馬升堂真不速勸我一振衣上黃臨風共

倒樽中淥肴蔬草草意不盡絲竹泠泠暗相屬琳宮
仙伯自閒暇幕府龕官苦煩促晚衙簿領當及期後
堂車轄要須漉令人更愧東宮師眷戀溪山棄葦屋
次韻轉運使鮮于侁新堂月夜

長愛陶先生閑居棄官後床上臥看書門前自栽柳
低徊顧微祿畢竟誰挽袖索莫秋後蜂青熒曉天宿
惟將不繫舟託此春江溜尺書慰窮獨秀句驚枯朽
遙知新堂夜明月入杯酒千里共清光照我茅簷漏
送梁交供知莫州

猛士當今守四方中原諸將近相望一樽度日空閒

暇千騎臨邊自激昂談笑定先降虜使詩書仍得靖
戎行君看宿將何承矩安用摧鋒百戰場

秋祀高禩二絕

蕩蕩巍巍堯舜前一丘惟見栢森然後來秦漢何堪
數跋扈飛揚得幾年

乾德年中初一新顏垣破瓦委荆榛興亡舉墜干戈
際閒暇方知國有人

過興教贈劍上人

四十年間此院留臨河看盡往還舟同來竝是二年

次韻王鞏代書

去年河上送君時我醉看君倒接籬一笑便成經歲
隔扁舟重到蒲城知舊傳北海偏憐客新恠東方苦
愬饑應笑長安居不易空吟原上草離離

次韻南湖清飲二首

翠箔紅窓映大堤遠來清飲歎參差盈盈積水東西
隔脉脉幽懷彼此知淶酒謾傳工破悶主人何敢恠
顰眉明朝看月雲開未試與詹家一問龜

坐客經年半已非喜君重到暫相依不嫌愛酒樽頻
倒只怕題詩紙屢飛耿耿幽懷誰與愬徐徐細酌未

應違從今更肯相過否幾誤風吹白版扉

次韻偶成

交情淡泊久彌新吏役縈纏日益紛香火社中真避
世簿書叢裏強論文樽壘正及明蟾夜舟楫來隨早
鴈羣世俗如君今有幾真將富貴等浮雲

中秋見月寄子瞻

西風吹暑天益高明月耿耿分秋毫彭城閉門青嶂
合臥聽百步鳴飛濤使君攜客登燕子月色着人冷
如水筵前不設鼓與鐘處處笛聲相應起浮雲卷盡
流金丸戲馬臺西山鬱蟠杯中綠酒一時盡衣上白

露三更寒扁舟明日浮古汴回首逡巡陵谷變河吞
巨野入長淮城沒黃流只三版明年築城城似山伐
木爲堤堤更堅黃樓未成河已退空有遺蹟令人看
城頭見月應更好河流深處今生草子孫幸免魚鼈
食歌舞聊寬使君老南都從事老更貧羞見青天月
照人飛鶴投籠不能出曾是彭城坐中客

次韻王鞏自詠

平生未省爲人忙貧賤安閑氣味長粗免趨時頭似
葆稍能忍事腹如囊簡書見迫身今老樽酒聞呼首
一昂欲挽天河聊自洗塵埃滿面鬢眉黃

次韻王鞏同飲王廷老度支家戲詠

白魚紫蟹早霜前有酒何須問聖賢上客遠來工緩
頰雙鬢爲出小垂肩新傳大曲皆精絕忽發狂言亦
可憐莫恠貧家少還往自須先辦買花錢

送王鞏之徐州

遨遊公卿間結交非不足高秋遠行邁黃泥沒馬腹
問君胡爲爾笑指籬間菊故人彭城守久作中朝逐
詩書自娛戲樽俎當誰屬相望鶴頸引欲往龜頭縮
前期失不遂浪語頻遭督黃樓適已就白酒行亦熟
登高暢遠情戲馬有前躅篇章雜笑語行草爛盈幅

歸來貯篋筍把玩比金玉吾兄別我久憂患欲誰告
孤高多風霆彈射畏顛覆白頭日益新歲寒喜君獨
紛紛衆草中冉冉凌霜竹恨我閉籠樊無由託君轂
次韻張恕九日寄子瞻

無限黃花簇短籬濁醪霜蟹正堪持坐曹漫爾誇勤
瘁割肉何妨誚詆欺世外罇壘終自放俗間簿領莫
相縻茱萸挿遍知人少談笑須公一解頤

王摩結詩云遙知兄

弟登高處挿遍茱萸少一人

戲次前韻寄王鞏二首

白馬貂裘錦翼羅離觴瀲灩手親持頭風欲待歌詞

愈肺病甘從酒力欺不分歸心太忽草更憐人事苦
縈縻相逢借問空長歎便捨靈龜看朵頤
細竹寒花出短籬故山耕耒手曾持宦遊蹙比鳧鷖
集歸計長遭句僂欺歌舞夢回空歷記友朋飛去自
難縻悠悠後會須經歲冉冉霜髭漸滿頤

贈杭僧道潛

月中依松鶴露下抱葉蟬賦形已孤潔發響仍清圓
潛師本江海浪迹遊市塵髭長不能翦衲壞聊復穿
瘦骨見圖畫禪心離攀緣出言可人意一一皆自然
問師藏何深不與世俗傳舊識髯學士復從璉耆年
塵埃既脫落文彩自精鮮落落社中人如我亦有旃
柰何一相見撫卷坐長歎歸去勿復言山林信多賢

張安道生日二首

椿年七十二迴新蓬矢桑弧記此晨養就丹砂無上
藥已超諸數自由身中年道路趨真境外物功名委
世人今夜空庭香火罷定應星斗識天真
十載從公鬢似蓬羨公英氣老猶克生時別得星辰
力晚歲仍加鼎竈功世事不堪開眼看勞生漸恐轉
頭空問公試覓刀圭藥歲歲稱觴此日中

李鈞壽花堂

并叙

尚書郎晉陵李公秉性直而和少從道士得養生法
未五十去嗜欲老而不衰爲南都通守其西堂北牖
下池生菖蒲開花三四芬馥可愛以書占之曰此壽
考之祥也因名其堂曰壽花而余爲作詩記之
石上菖蒲十二節仙人服之好顏色根如蟠龍不可
得葉中開花誰復識夫子自少讀道書年未五十嗜
欲除河流通天非轆轤下入金鼎融爲珠一醉斗酒
心自如鬼物窺覘驚睚眦菖蒲花開壽之符白髮變
黑顏如朱它年三朶訪君廬拍手笑我言不虛

次韻子瞻題張公詩卷後

世俗甘枉尺所願求直尋不知一律訛大樂無完音
見利心自搖慮害安得深至人不妄言淡如朱絲琴
悲傷感舊俗不類騷人淫又非避世翁閔嘿遽陽瘖
嚶嚶晨雞鳴豈問晴與陰世人積寸木坐使高樓岑
晚歲臥草廬誰聽梁甫吟它年楚倚相儻能記惜惜

次韻廣州陳繹諫議和陳薦宋敏求二龍圖二

首

曾送飛龍白日翔未應中路許還鄉鶴歸仍有當年
伴松老知經幾度霜城下寶坊聊寄榻朝中振鷺舊
成行相逢出處何須問五嶺清平十月涼

右和彥升寓定力

琳宮清淨思悠哉頗似山林未肯迴五日趨朝真自
適一樽無事得頻開董狐執筆何時易馬援征蠻未
遽來奔走安閑誰定是都門攜手一徘徊

右和彥升赴上醴泉

次韻王廷老寄子瞻

歌吹新成百尺臺青山臨水巧崔嵬佳人解作回文
語狂客能鳴摻鼓雷擷菊傳杯醒復醉採菱盪漿去
仍回新年聞欲相從飲春酒還須剩作醅

次韻頓起考試徐沂舉人見寄二首

齊楚諸生儼鞞紳人人願得出君門銜枚勇銳驚初
合棄甲須臾訝許奔細讀未辭燈損目久留終厭棘
為藩定應親刈翹中楚把卷喧呼半夜言

老年從事忝南京海內交遊尚記名怯見廣場心力
破厭看細字眼花生新科未暇通三尺舊曲惟知有
六莖空憶倚樓秋雨霽與君看遍洛陽城

前舉與頓同試西京

送李鈞郎中

君家毗陵本江南雖為浙西終未甘風流秀發自不
減氣質渾樸猶中含敲榜滿前但長嘯簿書堆案常

清談湖中往往載畫旃竹下小小開茅庵歌吟髣髴
類騷雅導引委曲師彭聃新茶潑乳睡方覺淥酒傾
水醒復酣一朝揮手去不顧使我把袂心難堪扁舟
水涸費牽挽瘦馬雪凍憂朝參一官來往似秋鷺薄
俸包裹如春蠶東南乞糜尚可得白首誰念家無甌
送文與可知湖州
連持梁洋印久作溪山主深知爲郡樂但畏買茶苦
來歸天祿閣坐守登聞鼓九重未明入百辟盈庭舞
城南獨歸臥心事誰當語舊聞吳興勝試問天公取
家貧橐裝盡歲莫輕帆舉茗溪淨多石弁嶺瘦無土

湖藕雪冰絲山茶潑牛乳香粳飯玉粒鮮鯽鱠紅縷
宮開水精潔人寄畫屏任俗吏自難堪詩翁正當與
從來思清絕況乃病新愈團團肘後丹髡髯胃中素
高臥鎮夸俗清談靜煩訴應笑杜紫微湖亭但狂顧
次韻王鞏見寄

池上輕冰暖却開迎春送臘仰銜杯君家有酒能無
事客醉連宵遣不迴詩就滴消盤上蠟信來飄盡嶺
頭梅商丘冷坐君知否餅罄應須有耻壘

喜雪呈鮮于子駿三首

發函寬大一封書臥閣雍容三日餘旋見雪花投夜

落未應天意與人疎瓦乾浙浙初鳴霰畦潤漸漸想
沒鉏高會梁園遺勝在早知詞賦似相如

春秋無麥自當書況復秋田水潦餘一雪端來救焦
槁千箱乞與等親疎消殘溫癘會非藥蝕遍陳根不
用鉏猶恐遠村霑未足試呼農圃問何如

璽紙鋪庭幾誤書楊花糝逕未春餘積隨平野分高
下舞信微風作密疎解使遊人似姑射仍令飛鳥變
春鉏共驚天巧無能學造物無心本亦如

次韻文務光秀才遊南湖

料峭東風助臘寒汀澄白酒借衰顏蒲床書卷何曾

讀數步湖光自不閑夢想綠楊垂後浦眼看紅杏照
前山新春漸好君歸速不見遊人暮不還

湖前小山
曰杏山

予瞻惠雙刀

彭城一雙刀黃金錯刀銀脊如雙引繩色如青琅玕
開匣飛電落入手清霜寒引之置膝上凜然愁勝肝
我衰氣力微覽鏡毛髮斑誓將斬鯨鯢靜此滄海瀾
又欲戮犀兕永息行路難有志竟不從撫刀但長歎
投刀淚如霰北斗空闌干歸來刈蓬蒿鉏田植芳蘭
惜刀不忍用用亦非所便棄置塵土中坐使鋒刃利
床頭夜生光知有蛟龍蟠慚君贈我意時取一磨看

留守與賓客會開元龍興寺觀燈余有故不預

中夜登南城

燈引雙旌萬點紅
傾城車馬在城東
使君行樂人人共
勸客安眠夜夜同
夢想笑談傾滿坐
臥聞歌筦逐春風
三更試上南樓看
無恨繁星十里中

樂城集卷之八

終

